

四庫全書

史部

欽定四庫全書

新安志卷五

宋 羅願 撰

婺源沿革

婺源望縣本休寧西南之回玉鄉唐開元二十八年正

月九日置以為縣治今清化鎮

寰宇志及祥符經皆言有婺水繞城三面故以

為名今有古縣記言有開元二十八年庚辰置縣在清

化凡百四十三歲中和二年壬寅汪武始於潰州之右

婺源蚡蛇港旁為營至天祐三年乙丑即營為縣號新

縣而舊縣改為清化鎮然則縣雖以婺水為名至新縣

始繞三

面耳以縣旁婺水為名按東湯記云東湯上應婺女

舊與黟歙接境隋文帝嘗廢黟歙二縣併入海寧以屬

婺州海寧即今休寧是嘗與婺州通封壤因以水流入

其州者為名也

此縣直以婺水流入婺州故曰婺源耳而寰宇志云縣又為婺女星之津與婺

州同義恐未必然

元和六年九月升上縣咸通六年刺史盧肇

奏於縣界內置弦高五福二鎮中和二年弦高鎮將汪

武率百姓於湔灘立營決遣鎮事天復元年就立婺源

都鎮天祐三年武死以朱環為新縣制置巡轄婺源淳

梁德興祁門四縣改舊縣為清化鎮吳南唐因之國朝

不領三縣而因新縣為治所既又升望縣

縣境

縣在州西南二百二十里東西廣長百六十里南北百三十里東至衢州常山界八十五里西至饒州樂平界百一十里南至饒州德興界百三十五里北至休寧界百三十里東南到衢州開化界三十五里西南到樂平界百一十里東北到休寧界百三十里西北到浮梁界百一十里



鄉里

其鄉六其里三十萬安鄉在東北其里松巖千秋靈屬  
長城大鰭來蘇鄉在西北其里安豐長壽何暮芮平來  
蘇浙源鄉在縣北其里鵠川臨城大安嘉福孝弟懷金  
鄉在西舊曰懷玉其里懷金黃岡游汀三谿福臨丹陽  
鄉在西南其里瑞亭雲亭環石還珠新定游汀鄉在西  
其里杭谿延賓符溪婺安鳳亭

戶口

天禧中主戶萬三千五百二十三口二萬九千六百七十七客戶千九十一口千六百六十四未經界前戶三萬五千一百五經界二萬六千二百二十二乾道主戶四萬一千九百五十五客戶九百有九

田畝

田園舊六十七萬九千七百七畝二角經界為七十九萬有奇今為七十九萬五千七百八十七畝二角五十五步陂百五十七處場十有七處

租賦

夏稅錢萬八千四百七十二貫四百一十九文絹四匹  
七寸布三匹二丈六尺綿九十七兩八錢租課百二十  
七貫七百一文片茶錢六十九貫九百三十七文秋稅  
糙米萬九千五百六十四石九斗七升七合鹽錢千一  
百三十三貫九百五十五文租課糙米五百三十八石  
一斗五合和買紬四千九百八十八匹絹萬四千八百  
一十三匹

酒稅

酒以紹興九年所收為額萬七千五百七十四文  
商稅按會要熙寧十年縣務四千七百八十二貫七百  
五十文清化鎮二百四十四貫五十九文今縣務以紹  
興五年所收為額千八百七貫八百九文清化鎮不復  
收稅

城社

縣城周九里三十步高一丈八尺自中和二年弦高鎮

將汪武為山營於此判鎮事天復初就立婺源都鎮建  
鼓角樓并挾城樓自是不復還舊縣南唐昇元二年檢  
校司空劉津為都制置使乃集所轄四縣增築新城津  
作記云爰選三農之隙<sub>音</sub>招諸縣之衆同其力役全  
此邊郵其西建衝山一營添新壘一里其北則築平蛟  
穴接出蛇城周環十里以來斧鉞半年之內閭閻盡易  
雉堞皆新啟昇元二門建東南兩市終聞悅辦略不告  
勞蓋其規模略見於此蛟穴者上北湖是蛇城者舊名

蚺蛇港今埂城下是社在縣西北

### 廟學

廟學在縣東先是熙寧中秘書丞鄱陽劉定為縣從學者率常百餘人以舊學之庠相與請於州即縣治西為屋百二十楹乾道中知縣彭烜又請於部使者以迎恩驛更為之而縣之先進王允恭李知己皆助以地至後政洪邦直成之

### 官廨

縣聽在城正中丞廳在東主簿尉廳並在西倉在東酒

稅務在西

祥符經有鹽倉都茶倉今無

坊場七處河渡一處

### 鎮寨

唐有弦高五福二鎮皆咸通六年置五福鎮還珠里是也弦高鎮後以為縣今縣治是也而唐開元中舊縣自天祐至國朝為清化鎮在縣西北六十里其營寨之制天祐中刺史陶雅遣朱環為縣制置時有衝山營左右威武兩指揮見於古縣記按楊行密初起廬州以陶雅

為左衝山將今州烏聊山下亦有地名衝山營者是皆因雅為名國家承平縣治不置兵今有中平巡檢寨在縣東七十里

館驛

新安驛在縣東七里舊曰來安新定驛在西八十里舊曰太白

道路

陸路東通常山西通樂平南通德興北通休寧水行自



縣東婺水通鄱陽江勝船二百石

山阜

浙源山在縣北七十里亦曰浙嶺高三百五十仞周二十五里北連黟縣魚亭山舊有石英鍾乳

大廣山在西北五十八里舊名大尖山高四百一十仞周三十里

斜山在東北七十里高二百仞周八里由浙嶺東北分為此山

大鱸山在縣東百三十里高三百三十仞東南接衢州  
界方輿記云堯時洪水谿谷皆滿有大鱸上至此及水  
涸而斃鱗骨鱗鬣積如山阜

小斂山在東南七十里高九十八仞周十五里南接衢  
州界有水西流入縣界

梅源山在縣西百二十里高三百二十仞西北連浮梁  
界舊名梅山天寶中加源字山產楊梅梁任昉為太守  
罷不復采

濬源山在西南百里高三百一十仞西南接浮梁樂平  
界舊名游山天寶六年改西連梅源山有水南流入吳  
溪

倚衡山在縣南百三十里高八十五仞西南連樂平縣  
山西連回嶺有水流入樂平

張公山在縣西北七十里高四百餘仞周十五里昔有  
張公隱此山采藥合丹數十年後忽不知所之

善山在縣南五十里高百五十仞周十里又有惡山隔

溪對聳祥符經云善山神為王惡山為夫人若兩處致祭則為災居人迎惡山神就善山祭祀俗謂之妻壻山三靈山在縣西九十里高二百八十仞周五十里晉時有三人此山修鍊後不知所之

大連山在西北百二十里高四百仞周九十里昔因寇亂鄉人相與保聚於此

甘子嶺在縣西七十八里四十二仞周二十五里舊云縣無甘子唯此嶺有株

芙蓉嶺在縣東七十五里高二百仞周三十五里

對鏡嶺在東八十五里高三十仞周十里羊鬬嶺在東九十五里高三十仞周二十里塌嶺在東北百五里高二十八仞周九里自芙蓉以下皆中通驛路接休寧之新嶺凡號五嶺縣走郡之道也舊由大坂趨郡數苦水潦後更從此五嶺幾及百年或亦自浙嶺往來

山川之名歲久

不可強通而新經每山之下輒為臆說解之今皆不取

龍尾山在縣東南百里高二百仞周三十里西連武溪

開元中獵人葉氏見石瑩潔鐫麤成研子孫持以獻令  
令訪匠琢之由是世始傳一名羅文山以石理所似為  
名

靈巖三洞在西北百二十里中有洞靈觀觀之東北曰  
慶雲洞巖竇皆五色兩崖瀑流之上有真人鸞鶴雲霞  
之象沂流秉燭而入者行可四五十步則芝田靈草羅  
列左右遇春雨暴漲有破帆爛槳流出西曰蓮華洞入  
百步有大石室廣十丈有像高丈八尺旁有羽蓋幡節

獅子蹲壘還丹芝草皆乳石所成遇拜章投龍往往有  
僊樂慶雲或珍禽奇獸致花菓於像前又有天井深不  
可測南昌含虛洞洞有二重外狹而內平有積雪臺沈  
香峰及唐神僊所畫龍是為三洞皆襟帶浙嶺聯連率  
山舊說者以為三天子都在率東豈謂是耶又有洞曰  
靈磨集僊魚龍張公垂鍾會僊合前為九大厯初有武  
姓者自黃山為旋風所吹入石龍洞因傍行入至此洞  
聞空中語笑之聲開成中浮梁鄭全福好游獵深入窮

谷與其徒相失暮有老人導游諸洞及出有鹿引上山之半坡自是結茅居之因修鍊為道士後徙居蓮華洞之石室將游天井乃求麻為綆轆轤而下中極寬廣徐步桃花谿上有老人乘鐵船其中全福揖之願借船還老人曰已渡上須還耶曰欲傳之人間耳老人曰如是速濟虎豹且至後三年當復來至岸循綆而上已七日矣又三歲至開成九年年百餘歲語門人曰必葬我浮梁白水鄉及卒弟子二百餘人與鹿俱送至夕陽嶺上



覺棺空發之唯履杖而已羣鶴翔引鹿亦失所在山有  
研石紫色如肝產巖之左右無定處瑩者可擬端溪然  
絕少大率燥慢而多瑕

石龍洞在縣西百十七里石龍山上東北高丈二尺廣  
五尺中有石室容數十人西南復有門高四尺廣二尺  
兩石對聳有如鑿成嘗有人入數里懼而復反下有池  
水焉

青苓洞在縣西八十里南北門相通中有物象如靈巖

# 水源

婺水出大廣山南流五十八里還繞縣城又南流四十里合斜水舟行通鄱陽江溉田二十二頃六十畝

武溪水出浙山南流五十里至縣西北合婺水溉田十三頃四十三畝

益陽水今符溪源也出浙山西南流百八十三里至三溪村合流入樂平界溉田三十五頃三十四畝

斜水出斜山南流九十里合婺水南入樂平界通舟行

溉田三十九頃十一畝

大鱸水出大鱸山西北流十七里合斜水溉田九頃二畝

小斂水出小斂山西南流四十里入樂平界溉田十八頃七十一畝

梅源水出梅源山東流三十七里合浙水溉田八十頃七十六畝

濬源水出濬源山南流合吳溪水溉田三十二頃二十

二畝吳溪在樂平界

杭溪水出石龍山南流至杭口入樂平界溉田三十八頃四十一畝

石牛潭在縣南十里岸旁有巨石如牛歲旱塗其背則雨

石門灘在婺水中兩石夾溪踊起如關中間通流昔人以其險比灩澦

古跡

吳村在縣北七十里有吳太子墓方輿記云昔吳王為越滅勾踐流其三子長子鴻逃於此死因葬焉遂名其葬處為吳山里按三國吳時嘗徙太子和於新都郡尋遣使賜死今歙縣有階村是其謫居處此亦當是太子和音轉而為鴻既不可考因以勾踐附會之耳唐中和年中改延賓里

寰宇志及新經皆言改為婁安里今從祥符經

祠廟

東嶽廟城隍廟在縣東婁女廟在縣西北忠顯廟在縣

南五龍廟在縣東南靈順廟在縣西其神五人舊號五  
通廟大觀三年三月賜廟額宣和五年正月封通貺通  
佑通澤通惠通濟侯紹興二年五月並加封四字十五  
年九月封六字乾道三年九月封八字淳熙元年進封  
顯應顯濟顯祐顯靈顯寧公汪司空廟在縣東南唐汪  
武始遷今縣者也斂溪廟在縣南

祥符經又有高溪中  
雲并勅封龐史君廟

### 道觀

紫虛觀在東北五十步舊名棲真觀南唐保大五年置

政和四年勅改

通元觀在靈巖舊名洞靈觀

僧寺

報恩光孝禪院在游汀鄉舊名中峰寺唐中和二年置  
崇寧四年閏二月改天寧萬壽禪院後改今額

大起禪院在萬安鄉唐乾寧二年置

智林禪院在縣城唐乾符二年置

保安禪院在縣城吳順義三年置

雲興禪院在丹陽鄉唐咸通元年置

普濟院在縣城舊名萬安崇福院唐中和三年置大中祥符六年十月勅改

隆興院在萬安鄉舊名永泰院大中祥符元年勅改

如意院在浙源鄉舊名荷恩寺唐開元二十八年置大中祥符元年十月勅改

靈隱禪院在浙源鄉唐天祐元年置

荷恩院在縣城唐光啟二年置



鳳林院在萬安鄉唐大中元年置

天王院在丹陽鄉唐乾符元年置天復二年賜額

州新經云

天福二年建非天福是後晉年號南唐不以為稱此自唐昭宗天復耳

感恩院在萬安鄉唐中和五年置

資福院在游汀鄉建隆二年置

金剛般若院在浙源鄉唐天祐二年置

香巖院在丹陽鄉舊名西干院慶曆二年七月勅改

樂嵒院在丹陽鄉吳順義年中置

大田院在西南七十里唐大和元年置

龍泉院在游汀鄉吳順義七年置

湖田院在懷金鄉唐中和二年置

湖山院在丹陽鄉吳順義三年置

沙門院在游汀鄉開寶七年置

白塔院在縣西八十里吳乾正三年置

龍祥院在游汀鄉唐中和元年置

山房院在懷金鄉吳大和元年置

靈僊院在萬安鄉南唐天祚二年置王提刑總角時每  
游戲寺中或指之曰君若登第者此井欄亦爛也及得  
官歸作詩云鄉人笑我無官分爛却靈僊石井欄里人  
至今誦之

松溪院在萬安鄉唐景福元年置

黃蓮院在萬安鄉唐咸通中置

院記咸通創基  
光化四年賜名

靈河院在縣西七十里唐咸通四年置政和七年賜額  
詰曲院在游汀鄉唐大和元年置

普利院在浙源鄉舊名養田院治平二年三月勅改

東廣福院在縣北百里

西廣福院在縣西九十里

國寧東尼院在縣東唐中和年中置

祥符經云刺史汪武置

國寧西尼院在縣西唐光啟三年置

明節尼院在縣東吳乾正三年置

賢宰

汪武者唐乾符中仕州為游奕使先是州遣羅芟為弦

高鎮將追寇於銅步以溺死四年遣武繼之武乃於武  
口初鎮至中和二年又於涇灘為營自武口徙判婺源  
都鎮事戰守數有功至龍紀初楊行密錄其功有云昨  
者趙乾芝殘黨經過遽能出軍戰敵擒節級六十餘輩  
殺凶徒二百餘人獲樊津之素書收熊秦之朱記時行  
密為寧國節度留後遂補為節度押衙光化三年遙領  
汀滁二州刺史始武以私財買民地置縣城邑以其稅  
入已戶左右戰守凡數歲遷縣入焉因以制置二十餘

年使其人不為外寇侵擾陶雅為歙州刺史暴增民賦  
武不為屈以故迄武之世縣人賴之天祐三年二月武  
死雅使衙內指揮朱環代之因制置巡轄四縣後劉津  
為都制置使而縣人至今祠武號汪司空子袞天復三  
年楊氏承制補左押衙長劍都副指揮使檢校工部尚  
書

吳乾正中萬景中以左右建威都指揮使知政縣事  
官銀青光祿大卿檢校尚書上柱國左僕射兼御史  
大憲見於汪台符所作如意院記則是乾正中不  
轄四縣也至南唐昇元中劉津乃復為都制置焉

鮮于侁字子駿閬中人登景祐中第授江陵府左司理

叅軍慶厯中天下大旱有詔中外臣僚實封言事侁上書推災變所興言甚切直移黜縣令又常攝婺源其治皆為諸邑最豪強畏之後多所更厯哲宗即位司馬公為門下侍郎除侁為京東轉運使公曰子駿不當更外顧東土承使者聚斂之後民不聊生煩子駿往救之耳比行又謂所親曰福星往矣安得百子駿者布在天下乎元祐初拜左諫議大夫侁為政以經術自輔所至有迹其去民追思之

績溪沿革

績溪望縣唐志云永徽五年析歙置北野縣後改績溪  
方輿志云本歙之華陽鎮梁大同元年置良安縣未詳  
所屬寰宇志作良安唐武德中廢永泰二年宣州旌德縣王萬  
敵入寇脇其居人賊平置縣以界內乳溪與徽溪相去

一里詰曲並流離而復合故以為名

方輿寰宇志皆言以華陽鎮為縣而

新舊唐書乃云北野縣改為績溪既無置績溪年月又北野舊城在今歙縣北三十五里其地與績溪殊不相直若據績溪以永泰二年置則北野縣在當時尚未廢也昔先正蘇公來縣自號其詩為華陽雜詠則有取於



方輿寰宇志所載舊唐書作漬溪他皆作績溪唐為中下本朝為望

縣境

縣在郡東北六十里東西廣長百三十三里南北六十  
五里東至臨安府昌化界八十三里西至寧國府旌德  
界五十三里南至歙縣界三十里北至寧國府寧國縣  
界三十五里東南及西南到歙縣界各三十里東北到  
寧國界三十五里西北到旌德界五十三里

鄉里

其鄉十其里二十有六仁慈鄉在縣城內外其里龍泉  
龍宣良安鄉在縣南其里新合寧泰花干新安鄉在縣  
東其里龍山新興永寧遵化鄉在東北其里石門新建  
借溪宣政鄉在縣北其里楊溪斜溪歸仁新華鄉在縣  
西其里分流幽山隨溪楊山鄉在縣西其里徽陽修仁  
高峰修仁鄉在縣西其里常溪守節歸善惟新上鄉在  
縣東其里新安惟新下鄉在縣南其里感化麟福

戶口

天禧主戶七千七百八十七口萬五千四百七十九客  
主四百四十八口五百二十五未經界戶萬一千一百  
六十經界九千一百六十乾道主戶八千五十客戶三  
百四十一

田畝

田園舊十萬四千五百三十八畝三十三步經界為二  
十九萬六千畝有奇今為三十萬九千五百六十六畝  
三角三十一步塘九十五處竭百一十七處

租賦

夏稅紬三百六十四匹三丈三尺六寸四分絹四千五  
十三匹三丈二尺五寸七分布八百九十八匹一尺五  
寸三分綿三萬二千六百五十七兩四錢雜錢千五百  
七十一貫四百九十文軍衫布四百一十九匹三丈八  
尺小麥八百三十三石一斗七升一合秋稅糙米萬六  
千九百七十七石一升九合六龠鹽錢七百三貫二百  
五十四文七分和買紬千六百一十三匹絹四千九百

一十三匹

酒稅

酒以紹興十三年所收為額計七千四百九十三貫六百三十文商稅熙寧十年收一千四百三十六貫七百二十九文今以紹興九年所收為額計二千六百五十九貫二百八十文

城社

城周五里其坊七曰崇賢崇仁歸德連城敦里清寧臨

河社在縣西學在縣東紹興二十五年知縣滕齋增建學為一堂二位四齋合三十餘間白州試藝給官田五頃放生池在縣北源通龍陂可數畝

### 官廨

縣廳在城東南隅舊有秋風堂後改為景蘇堂刻蘇公像并三十六詩主簿廳在縣廳西尉廳在東常平倉在東北酒稅務在城東南隅坊場六處河渡無

### 驛亭

良安驛在城東南隅翠眉亭在城西一里元豐中蘇公  
為縣行平岡上見雙嶺如眉勢作亭對之名翠眉且以  
志故鄉峨眉之思亭焚于宣和中紹興六年知縣賈詡  
復新之

橋道

徽溪橋在縣西徽嶺下臨溪橋在縣南三十里路道東  
通昌化西通旌德南通歙縣北通寧國界

山阜

大鄣山在縣東六十里高五百五十仞周百五十里祥符經云即三天子鄣山按郭璞云三天子鄣山在新安歙縣東今謂之王山浙江出其邊此幾是乎舊出銀鉛

唐天寶四年嘗采八年罷今無復有

三天子鄣山鄣或作都故顧野王以

為今永康縉雲山或又以為廬山而婺源靈巖三洞亦以為當之唯此山有鄣名而廬潘亦以為丹陽郡舊名鄣郡者由此蓋自秦鄣漢丹陽郡都尉皆治歙今此山與吳地分界又去故鄣亦不遠然鄣郡有平去二聲此山直作去聲

石金山在東北三十里高六百仞周三十里出衆山之



上相傳為甘露大士道場每夕常顯光相大率如五臺  
廬嶽所見然不知所始宣和二年旱僧元立披榛莽晝  
夜勤苦禱雨於此所見多異由是寢聞元立乃作室於  
山之左協力田種藥奉香火焉

龍從山在東北二十九里周二十五里其山四合中有  
官道趨寧國縣亦與寧國分界立柵於此今人謂之叢  
山

大葵山在縣北六十里高四百仞周百里舊說以為上

排層漢前壓澄潭蹲形矯首如獒猛犬焉

郎山在東北十五里高二百三十仞周三里亦謂之郎  
嶠山下有郎溪驛路在焉兩旁有石道長數百步直下  
數百尺名翡翠巖不生草木有類石洞云

猗溪山在東北八十里高五百五十仞周百四十里西  
連龍嵒山有水流入縣界

凜山在西北三十里高四百五十仞周十五里

古塘山在西北五十三里高三十五仞周十五里西至

黃石坑與旌德分界

萬山在西北五十三里高四十五仞周十五里東至黃石坑與旌德分界

植山在縣北四十里高五百五十仞周八十里有水西北流十三里入黃石坑

石照山在縣東五里有石高二丈光可以鑑泉味尤甘旁有石照院

徽嶺在西北十里高四百五十仞周三十里舊名大尖

山其上為官道走旌德道也凌曉常行雲氣中

王荊公為江東

提刑時有度麾嶺詩用此旌麾字又有詩云曉度藤溪霜落後夜過輦嶺月明中則又用此輦雉字然太平廣記載績溪有大徽村又宣和中改州為徽說者以為取此嶺為名則徽字近是

佛論嶺在西北四十里高四百五十仞周四十里祥符經云昔嘗有高僧講論於此故名

### 水源

臨溪水源出縣北三十里又名乳溪西南流七十八里合揚之水方輿記云臨溪石在縣北三里溪岸上其方

二丈其平如砥溪水甚宜浣紗數里婦人悉來浣紗去  
家既遠遂績其旁以守之春時多麗服羣績於此雖不  
浣紗者亦會績焉縣名亦兼取此義

徽溪水出徽嶺水分為二其東北流者入旌德界此水  
入縣經修仁鄉詰曲四十里南入常溪合揚之水入歙  
縣界

登水出徭溪山南流九十里合揚之水入歙縣界溉田  
二頃

常水出黃蘗山南流五十里合揚之水入歙縣界溉田  
一頃三十三畝

蒼龍洞在縣北十五里山峻拔回顧如立壁中有怪石  
瀑水如簾其下為龍池遇旱禱之有應亦有石可鑑慈  
雲院在其側

祠廟

忠顯廟有二一在縣側一在東七里越國公故城宅井  
在馬梓山廟在東南一里方輿記云初於山下置良安

縣舊有方白石忽化為雙白鳥飛向山遂於山下鳥棲處立廟邑人敬之行立種殖皆不敢背又有將軍廟吳山太婆廟節司徒廟歸善廟溪口廟郎嶸廟並在縣東僧寺

太平興國禪院在良安鄉新合里舊名華嚴院太平興國五年二月勅改

光相院在良安鄉寧泰里舊名寧泰院治平元年十月勅改

清福禪院在惟新下鄉咸化里舊名清塘院治平元年十二月勅改

普照院在仁慈鄉義興里治平元年十二月勅改

慈雲院在仁慈鄉龍泉里舊名慈恩院治平元年十二月勅改

求安院在新安鄉龍興里舊名新恩院治平元年十二月勅改

石門廣福院在遵化鄉石門里舊名石門院熙寧四年



三月勅改為壽聖院隆興中壽聖例改廣福有三廣福

故還以石門別之

按五朝隆平集治平三年詔一應無額寺院屋宇及三十間以上者並賜

壽聖為額以英宗誕聖日號壽聖節故也

廣化院在宣政鄉斜溪里舊名宣化院治平元年十二

月勅改

覺乘院在宣政鄉斜溪里舊名釋迦院治平元年十二

月勅改

靈鷲院在新華鄉幽山里舊名幽山院治平元年十二

月勅改

清隱院在楊山鄉高峰村舊名高峰院治平元年十二月勅改

廬山廣福院在楊山鄉修仁里舊名廬山院其改壽聖及廣福與石門廣福院同時

兜率院在修仁鄉常溪里舊名彌勒院治平元年十二月勅改

正覺院在修仁鄉常溪里舊名菩提院治平元年十二月

月勅改

天王廣福院在仁慈鄉義興里舊名天王院改壽聖及廣福如石門廬山同時

崇福院在修仁鄉常溪里唐光化二年建

興福院在修仁鄉守節里唐天寶二年建

新興院在惟新上鄉新安里唐乾符五年建

藥師院在新安鄉永寧里唐天祐二年建

前山院在宣政鄉歸化里唐咸通五年建

義林院在惟新下鄉麟福里天禧三年建

賢宰

蘇轍字子由眉山人自簽書南京判官謫監筠州鹽酒稅元豐八年以奉議郎知縣事適有朝旨江東諸郡市廣西戰馬江東素乏馬每縣不過十餘匹而諸縣括民馬吏緣為姦有馬之家為之騷然公謂尉郭惇愿曰廣西取馬使臣未至事忌太遽徐為之備可也吾邑孰為有馬者尉曰邑有遞馬簿歲月遠矣然有無之實尚得

其半也即取簿封之又曰何從得馬牙人乎曰召諸牙  
詰之則馬牙出矣果得曾為人賣馬者辭以不能曰吾  
不責汝以馬但為我供文書耳曰諾州符日至縣督責  
買馬乃以夏稅過期為名召諸鄉保正副問之曰汝保  
誰為有及格馬者相顧辭不知曰保正副不知誰當知  
者第勿以有為無無為有則免罪矣汝等所具吾將使  
衆人訴其不實而陳其脫畧者不可不實也人知不免  
皆以實告復喻之曰買馬事止此矣廣西取馬者至郡

則馬出若不至則已矣皆再拜曰邑人幸矣然取馬者卒不至哲宗即位除秘書省校書郎終門下侍郎

崔鷗字德符雍丘人父毘有聞於時自雍丘徙陽翟鷗能文工於詩貌瘁氣剛登進士第元符末以頻年四月日蝕詔求直言鷗上書辨司馬溫公力抵時相宰相蔡京使以邪正二等差定上書者列鷗邪下坐廢三十年政和中為績溪縣令後嘗召為殿中侍御史不果拜靖康初擢右正言力疾就職凡三疏論列諫官馮澥及請

斬蔡京病甚乞解官除直龍圖閣管幹西京嵩山崇福宮卒京師有婆婆集三十卷行於世中書舍人晁說之以為前世黃叔度元魯山本朝王子野江鄰幾之流說之頃與鷗同書邪籍者也

黥縣沿革

黥縣自秦以為縣屬鄣郡縣居黥山之陽故名或曰黥與鑿同以縣南墨嶺出石墨故也

此據水經及舊唐書而寰宇志又言

置在黥川因名漢改鄣為丹陽郡縣屬如故成帝鴻嘉二年以

黠為廣德王國立中山憲王弟孫雲客於此立三年而  
絕平帝元始二年復以故國立廣川惠王曾孫倫為廣  
德王傳至子赤王莽篡位明年廢而改縣曰愬鹵及漢  
建安之亂縣人陳僕祖山以二萬戶屯林歷吳使賀齊  
攻之僅免遂以歙分五縣與黠為六置新都郡晉太康  
元年更郡為新安而割故廣德王國為廣德縣隸宣城  
郡隋開皇十一年歙州治黠大業中州復為新安郡治  
休寧唐永泰元年平方清因其壘析本縣地及饒州之



浮梁置祁門縣又析本縣及浮梁池州之秋浦置石埭縣及國朝以宣州廣德縣置軍又自析出為建平縣大抵今黟縣祁門池之石埭廣德之廣德建平凡五縣皆秦漢黟縣之故境而今黟則狹矣元和六年九月與婺源皆稱上縣國朝為緊縣

縣境

縣在州西百五十五里東西廣長五十三里南北百十二里東至休寧界五十里西至祁門界二十五里南至

休寧界四十五里北至寧國府太平界五十里東南到  
休寧界四十五里西南到祁門界五十里東北到太平  
界百五里西北到石埭界八十里

鄉里

其鄉四其里二十會昌鄉在縣西北其里連城嘉祥歷  
陽延福蜀里敦義順仁鄉在東北其里古城長寧懷仁  
順化新政鄉在東南其里清德明德魚亭東亭雲巖懷  
遠鄉在西南其里昇平靖節安寧新城豐樂

戶口

天禧中主戶六千二百一十六口萬七千九百七十四  
客戶四百三十三口五百三十七未經界戶萬二千三  
百六十五經界九千四十一乾道主戶五千九百有一  
客戶一千八百六十八

田畝

田畝舊九萬二千一百三十五畝經界為三十三萬四  
千四百三十畝二角五十八步今增十畝竭一百九十

處

租賦

夏稅紬二百二十七匹一丈七尺五寸七分絹二千八百二十七匹二丈五尺八寸二分布六百一十匹六寸一分綿二萬四千二百七十三兩二錢四分小麥五百九十八石一斗一升九合錢二千二貫五百二十三文軍衫布三百四匹二丈一尺秋稅糙米萬三千二百三十五石三斗七升鹽錢五百四十二貫一百三十七文

和買紬一千八百七十五匹絹四千六百八十八匹

酒稅

酒以紹興二年所收為額計九千六百七十五貫三百三十六文商稅熙寧十年收一千二百七十九貫五百八十四文今以紹興十三年所收為額計二千一百貫九百七十二文

城社

縣城周二里三百五十步社在西南學在南

官廨

縣廳在城正北主簿廳在其東尉廳在西南省倉常平倉在縣門之內酒務稅務在廳東

鎮場

西武鎮在縣西二十里廂口鎮在西北二十里

縣今無西武只

有廂口鎮在縣內坊場二處

驛道

臨黔驛在縣城內魚亭驛在縣東三十五里道路東南

各通休寧西通祁門北通太平界

山阜

牛泉山在縣北五十七里高九百五十仞東接太平界輿地志云牛泉嶠自山下至頂九里一頓凡有九頓並山為路狹處纔七八寸臨不測之深上嘗風木雖合抱而長不至丈南向乃有之雖盛夏亦須衣襦頂有水方廣丈許冬夏不增減名牛泉相傳舊無水牛以足跑土成池山上往往有古人累石為路處蓋昔往丹陽郡之

道也

武亭山在西南十八里接祁門界高二百仞周五十里  
有水東流入縣界

魚亭山在縣南三十五里高二百五十仞周三十里水  
東流入休寧界方輿記云每歲西江魚船至祁門縣捨  
舟登陸上此山東水次淹流待船故曰魚亭

按黟縣舊有四亭八

墅魚亭其一也方輿所說似  
以為停留之停未知果否

復

扶又

山在縣南三十六里高二百六十仞周二十九



里方輿記云山甚孤峻石壁四絕亦謂之五硯二礫兩邊皆石壇中央有溝纔五六尺許水甚懸迅捫蘿挽葛時有至者山翠激流為羣峰之秀東南水流入休寧界

硯音痕  
礫音樂

林厯山又名頂游山在縣西南十里高三百仞周三十里漢末陳僕祖山所屯

戢兵山在縣北十五里高百仞周十里舊名石鼓山有石鼓石人石驢俗傳石鼓鳴即驢鳴長官不利後鑿其

鼓破之遂不復鳴天寶六年改名戢兵三姑山一名吉陽山在東北十五里高二百五十仞周三十里其山三峰地輿志云三姑山多石三年一遇野火自然燒盡故老相傳號三姑磨云若非磨年百姓放火輒有雨中峰有瀑布新安記云天將雨此山先有鼓角之音靄山在縣南十里孤峰如削

### 水源

吉陽水出吉陽山東流至白茆渡入縣界屈曲九十里

經黎陽口合南當水東流三十五里下黃墩村北流四十五里出歙浦合揚之水通舟船溉田四十四頃

章水出縣北十八里章山東南流二十七里至縣界又東南流五里合橫江水溉田十一頃

橫江水出武亭山東南流二十八里合章水入魚亭口溉田八頃

魚亭水出魚亭山東流二十里至魚亭口合吉陽橫江水東流入休寧界

牛泉水出牛泉山東南流八十里至魚亭口合吉陽水  
溉田三頃

釣灘在縣南十八里亦名潯陽臺相傳李太白游新安  
嘗釣於此作詩云磨盡石嶺墨潯陽釣赤魚靄峰尖似  
筆堪盡不堪書

古跡

石墨井在縣南十六里方輿記云墨嶺上出石墨土人  
採之以書採處成井今為水所淙其井轉深寰宇記云

墨嶺上有石特起十餘丈峰若劒峙有靈鼓潛發令長  
每以為候鳴則不利嶺旁竇出石墨可書又新安圖經  
云歲貢柿心墨木黥之字縣職此之由

據寰宇記有石鼓則是前戢兵

山矣又云墨嶺山上有穴中有墨石軟膩土人取為墨色甚鮮明可以記文字按今石墨嶺墨極麤爛乃未聞採以書者用以染卑色深而香不假他物也

樵貴谷方輿地志云黥縣北緣嶺行得樵貴谷昔有人  
山行七日至一斜穴入穴廓然周三十里土甚平沃中  
有十餘家云是秦時離亂入此避地又按邑圖有潛氏

村事已見第一卷

僕城里在林厯山下以陳僕所屯為名俗說每社日僕則遣人掠酒肉村人苦之遂以社之明日為社至今猶然

獨母柴在縣南十五里昔有寡婦死無以葬村人為覆以薪後人行經其處者皆以一枝草投之迄今不絕

祠廟

土地廟石將軍廟頂遊廟在縣西橫江廟靄山廟復山

廟在縣南城隍廟戢岳廟五郎廟在縣北石孟廟在西  
北祥符經所載今又有吉陽廟在縣東噎潭廟在東南

道觀

靈虛觀在西南一里舊名洞靈觀崇寧四年九月勅改

僧寺

廣安寺在會昌鄉嘉祥里舊名永寧寺梁大同元年建  
大中祥符元年勅改

遵孝寺在會昌鄉延福里舊名石孟崇福院唐天復三

年後改

延慶院在新政鄉魚亭里舊名阜口院唐大中三年建  
大中祥符四年勅改

子路院在順仁鄉懷仁里唐會昌三年建

霞山院在新政鄉明德里唐大中三年建

精林院在會昌鄉歷陽里唐乾寧五年建

石鼓院在順仁鄉順化里唐會昌五年建

閑居尼寺在縣城內梁大同元年建



縣令

吳茹公者宋黟縣令泰始二年輔國將軍行會稽郡事  
孔凱與潯陽內史行江州事鄧琬等謀反琬先遣新安  
太守陽伯子及軍主任獻子襲茹公茹公固守力不敵  
棄城走伯子等屯據縣城茹公與臺軍主丘敬文李靈  
賜蕭伯壽等攻圍彌時八月乃克斬伯子獻子二人首  
何思澄字元靜東海郟人梁天監中遷治書侍御史時  
始重此選車前依尚書二丞給三騶執盛印青囊舊事

糾官印綬在前故也久之遷秣陵令入兼東宮通事舍人昭明太子薨出為黟縣令

庾仲容字仲容潁川鄢陵人除尚書左丞坐推糾不直免仲容博學少有盛名頗任氣使酒好危言高論唯與王籍謝幾卿情好相得二人時亦不調遂相追誕縱謀飲不復持檢操久之復為諮議參軍出為黟縣令

薛稷蒲州汾陰人唐文學館學士收之從孫少擢進士入官後坐法左遷稍轉縣令今有薛公祠廣德二年所

立其文可辨者贊賦平而邑里有革苦窳息而山谷知  
謹云稷官至太子少保又有李子稱者汝陽王璵之孫  
袁藹者東郡陽夏人皆唐世為令者

汪澥字仲容涇縣人汪氏系本黟歙而宣城相去為近  
不知其先於黟歙何別也幼從安定先生質易中疑義  
又從王荊公遊首傳其經說太學初成選為錄神宗書  
其名屏間年四十餘始登第後知黟縣專用靜治教條  
可法常摘偽券及築長堤除水害至今為邑人所紀終

大司成顯謨閣待制

新安志卷五

欽定四庫全書

新安志卷六

宋 羅願 撰

叙先達

昔者春秋之世楚屈建之信聞於諸侯其大夫誦之以為晉卿不如楚意楚之賢晉無以當之至建問晉范會之德於趙武武告以夫子之家事治無隱情於國無愧辭於鬼神者建退而誦之則晉先賢之風烈建曾不足以得其萬一逮魯叔孫豹聘於晉則又以為晉范氏之

先僅可謂之世祿而魯有先大夫曰臧文仲者既沒而  
言立然後可以謂之不朽由此言之世之賢者可有既  
乎是數者不惟其人之差品固若是亦習於所聞各以  
其國之賢為足以矜於天下也夫賢之所在人猶以其  
於已為近而矜之又况善行之發於吾身而令聞之施  
於吾體者乎榮亦至矣然則進德脩業又安可後哉新  
安自程靈洗以節顯梁陳間唐及五代相繼有人迨聖  
宋則名臣輩出夫豈惟其土之多賢要當以世論之若

梁員外散騎侍郎李祿太常卿胡明星唐中書舍人吳  
鞏南唐宰相馮延巳勤政殿學士延魯樞密使查文徽  
國朝尚書郎舒雄太子左贊善大夫呂文膺虞部員外  
郎方演及近世名卿大夫未得其行狀者皆不敢輕有  
所附著以存蓋闕之義前世羽林將軍盧元卿刑部郎  
中程皓則又不知其世謹錄知者見其左

程儀同

程儀同靈洗字元滌海寧人侯景之亂保黠歛以拒景



梁元帝授譙州刺史資領本郡太守後助王僧辯鎮防  
及武帝誅僧辯靈洗率所領來援其夜力戰於石頭西  
門軍不利遣使招諭久之乃降

按陳書只云軍不利謂  
靈洗軍也而南史云武

帝軍不利  
今從陳書

帝深義之授蘭陵太守仍助防京口及平徐

嗣徽有功除南丹陽太守封遂安縣侯後隨周文育西  
討王琳軍敗為琳所拘尋與侯安都等逃歸累遷太子  
左衛率武帝崩王琳前軍東下靈洗於南陵破之擄其  
兵士并獲青龍舟十餘乘以功授都督南豫州刺史侯

瑱等敗王琳於柵口靈洗乘勝逐北據有魯山召為左  
騎將軍天嘉四年周逵重寇臨川以靈洗為都督自鄱  
陽別道擊之逵又走山谷間遷中護軍出為都督郢州  
刺史廢帝即位進號雲麾將軍華皎之反遣使招靈洗  
靈洗斬皎使以狀聞朝廷深嘉其忠為增守備給鼓吹  
一部因推心待之使其子文季領水軍助防時周將元  
定率步騎二萬助皎圍靈洗靈洗嬰城固守及皎敗乃  
出軍躡定定不獲濟江以其衆降因進克周沔州禽其

刺史裴寬以功改封重安縣公靈洗御下嚴刻士卒有小罪必以軍法誅之然號令分明與同甘苦衆亦以此附焉性好播植躬耕稼別水陸所宜刈穫早晚雖老農不及伎妾無游手竝督以紡績至於散用貲財亦無所吝卒贈鎮西將軍開府儀同三司謚忠壯配享武帝廟庭

程都督

程都督文季字少卿幼習騎射多幹畧果決有父風弱

冠從靈洗征討必先登陷陳靈洗與周文育侯安都等  
敗於沌口為王琳所執武帝召陷賊諸將子弟厚遇之  
文季最有禮容深見賞文帝嗣位累遷新安臨海太守  
尋乘金翅助父鎮郢城華皎平文季父子竝有捍禦之  
功及靈洗卒文季盡領其衆起為超武將軍仍助防郢  
州文季性至孝雖軍旅奪禮而毀瘠甚至服闋襲封隨  
都督章昭達率軍往荊州征梁梁人與周軍多造舟艦  
置青泥水中昭達遣文季潛道戢往盡焚之又夜入其

外城殺傷甚衆既而周兵大出文季僅以身免以功加  
通直散騎常侍太建五年都督吳明徹北討至秦郡秦  
郡前江浦通涂水齊人下大柱為杙柵水中文季前領  
驍勇拔開其柵明年率大軍自後至攻秦郡克之又別  
遣文季圍涇州屠其城進拔盱眙仍隨明徹圍壽陽文  
季臨事謹飭御下嚴整前後所克城壘率皆迫水為堰  
土木之功動踰數萬置陳役人必先諸將夜臥早起迄  
暮不休軍中服其勤幹每戰常為前鋒齊軍深憚之謂

為程虎

陳書云程獸南史云陳彪皆以唐諱虎字故也

以功除散騎常侍帶新

安內史累遷北徐州刺史加都督後隨明徹北侵軍敗為周所囚授開府儀同三司十一年自周逃歸至渦陽為邊吏所執送長安死於獄是時既與周絕不之知至德元年後主始知之追贈散騎常侍詔傷其廢絕降封重安縣侯以子響襲封

### 吳御史

吳御史少微新安人第進士長安中累至晉陽尉與武

功富嘉謨同官友善先是天下文章以徐庾為宗氣調  
益弱獨少微嘉謨屬詞本經學雄邁高雅時人慕之文  
體一變稱為吳富體少微撰崇福寺鐘銘嘉謨作雙龍  
泉及千燭谷頌尤為作者推重并州長史張仁亶待以  
殊禮坐必同榻時魏郡谷倚為太原主簿亦以文詞著  
名時號北京三傑中興初吏部侍郎韋嗣立薦少微嘉  
謨同時為左右臺監察御史少微卧病聞嘉謨死慟哭  
賦詩尋亦卒有文集各五卷谷倚後客死文章遺失少

微子鞏開元中為中書舍人新舊唐書皆稱少微新安人惟唐御史臺記稱少微  
渤海人按祥符圖經亦載少微於歙縣人物中今從之  
又舊書文苑傳稱吳富文集各五卷經籍志三人集各

卷十

王校正

王校正希羽歙州人凡稱歙州及新安人之類皆據其所出書錄之得其縣者自書縣詞

藝優博天復元年登第時年七十餘先是昭宗新平內  
難聞放新進士詔知貢杜德祥有孤貧屈人宜以名聞  
特勅授官故德祥以希羽曹松劉象柯崇鄭希顏應詔



各授校正其制云念爾登科之際當予反正之年宜降  
異恩各膺寵命松舒州人學賈司倉為詩此外無他長  
時號松啓事為送羊脚狀年亦逾七十象京兆人崇希  
顏閩人皆以詩卷及第年六十餘號五老榜

汪處士

汪處士台符歙州人博學能為文好王霸大畧唐末見  
天下方亂乃力耕不出南唐先主輔政移鎮金陵往上  
書陳民間九患先主覽之且加條問為宋齊丘所抑齊

丘始字超回台符貽書譙之曰聞足下齊先聖以立名  
超亞聖而為字齊丘慙改字子嵩後使人誘與飲酒夜  
縛其口沈石城下先主聞而惜之及昇元中更檢校民  
田物產以三等定賦又使民輸粟請鹽罷其科借商旅  
賣鬻則征之過者則否舟行無力勝之稅郡縣吏胥降  
而有限凡數十年民得以小康皆自台符發之台符所  
為碑或  
以管驛巡官九江巡使等冠銜此一時  
祿仕之賤者故依江南野史稱處士

### 舒狀元

舒狀元雅歛縣人幼好學才辭敏贍南唐時以貢入金陵吏部侍郎韓熙載好接誘後進苟有才藝必延致之雅以文贄一見如舊與為忘年交在門者凡數十人推雅為首雅輕黠敏給熙載狎之後主立頗疑北人熙載懼愈肆情坦率家伎百餘人時操獨弦琴使雅執板隨房歌鼓以為笑樂會熙載知貢雅以狀元登第然內外亦無異辭歸朝歷將作監丞太宗於禁中造閣取四庫書數萬卷藏之時秘書監李至因薦雅及杜鎬等入覲

校理自太平興國中編纂文苑英華淳化中校史記前  
後漢書至道中脩續通典校定周禮禮記公羊穀梁傳  
疏及別纂孝經論語正義咸平中校七經疏義雅必預  
焉累遷職方員外郎咸平末出守舒州以守職勤恪為  
稱樂其風土有終焉之志秩滿乞致仕就掌靈仙觀雅  
嘗慰薦王欽若後欽若為言大中祥符三年直昭文館  
卒年七十餘弟雄登端拱中進士第官至尚書郎

呂侍郎

呂侍郎文仲字子臧新安人南唐時第進士為大理評事歸朝累遷少府監丞預修太平御覽廣記文苑英華轉著作佐郎太宗聽政之暇日閱經史患顧問闕人太平興國八年始以文仲為侍讀尋又為翰林侍讀賜緋魚寓直御書院立本官班多以日晚召見出經史令讀或就訪外事時侍書王著書學葛湍亦直禁中文仲以書史著以筆法湍以字學深承顧接至道初上嘗草經史故事三十紙召文仲讀畢因刻石令內侍齎數百本

藏江東名山福地道宮佛廟及分賜高逸不仕敦朴有  
行為州里所稱者真宗咸平二年以楊徽之夏侯嶠及  
文仲竝為翰林侍讀學士邢昺為侍講學士先是侍讀  
名秩未崇及置此職班秩賜翰林學士祿賜如之設直  
廬於秘閣侍讀更直侍講長上日給尚食珍膳夜則迭  
宿日具當直官名於內東門進入召對訪問或至中夕  
中謝日賜與如翰林學士受詔集太宗歌詩為三十卷  
嘗以御史中丞鞠曹南獮民趙諫獄忽御寶封軒裳姓

名七十餘人令窮治皆昔委諫營產買妾者文仲從容  
奏更請察其為人密籍姓名候薦選對揚之日斥之未  
晚從之景德中終刑部侍郎集賢院學士文仲富詞學  
有器韻善應對久居禁近周密詳審嘗使高麗清潔無  
所求遠人悅之每使至必詢其出處時呂端呂祐之亦  
嘗為使三人皆寬厚文雅國主王治嘗對使者劉式語  
及中國用人必應以族望如唐之崔盧李鄭者式言惟  
賢是用不拘族姓治曰何姓呂者多君子也後以其子

士永為奉禮郎姪孫從政同學究出身兄孫湊

### 大魏太尉

大魏太尉羽字垂天婺源人唐鄭公之後

真宗名臣傳云羽自言鄭

公十四世孫按陳無已作魏嘉州銘稱司徒蕃之子別居歛之婺源其後四世而至羽然則羽乃鄭公十世孫耳

初仕江南為昭文館校書郎出為雄遠軍判官今太

平州是也王師渡江道出城下羽歸款轅門太祖聞而嘉之特拜太子中舍命知興州尋知京兆府屬河間守將以征賦權酷之入盜為已用遣羽覆實期年得羨餘



以億計因言本州錄事參軍郭震十年未代河間令崔能前為即墨未滿歲而移遷調之司頗未均一太宗以其敢言詔加褒轉後為戶部郎中上疏願省三司職官之半可以責成仍條利病二十事下有司議皆以為便遷鹽鐵最上案判官立位為三司判官之首上以唐世尚臺閣目卿監為冗官欲復古優其選擇諸曹正郎有才望者竝補少卿監以羽為秘書少監嘗請簿計王府僚吏之過乞依唐置封駁司命大臣領之事皆見從上

稱其有心計通明吏道真宗即位歷禮部侍郎卒年五十八以其長子玠為奉禮郎玠卒羽妻自陳家貧無祿錄其子校書郎瓘為奉禮郎後贈羽太尉羽強力善處繁劇在三司出入十八年習知財賦之事

### 查秘監

查秘監陶字大鈞休寧人世仕南唐祖文徽工部尚書陶明習法令仕為常州錄事參軍歸朝太祖命大理試以律學除本寺丞累轉侍御史權判大理寺咸平五年

遷秘書少監復判大理先是中書以朱搏議法不當請用陶真宗曰比聞陶亦深文宰相言當今習熟法令少如陶比者遂可之楊億知審刑院陶屢攻其失遂命代億仍賜金紫卒年五十景德二年以其子前崑山尉慶之為太常寺太祝

張度支

張度支諤字昌言歙縣人能詩有吏才仕江南為秘書丞通判鄂州王師南下與州將許昌裔叶謀歸欵太祖

召見勞問賜資甚厚授右贊善大夫蜀平選知閬州太  
平興國中就除西川轉運使先是中土罕習舟船諤以  
其軍分隸諸州自是無覆舟之患後以三司度支判官  
出為荆湖江浙等道制置茶鹽副使以子秉故累贈太  
子太傅

### 許司封

許司封逖字景山歙州人

題名碑言許逖祁門人而安定先生為許俞作傳言黟縣

人今從歐陽公所  
作行狀言歙州

唐睢陽太守遠五世孫曾祖儒不義

朱梁自雍州入於江南終身不出祖稠仕江南參德化

主軍事父規嘗羈旅宣歙間

歐陽公言邈世家歙州而許氏家譜乃云規嘗羈旅

宣歙間豈是時僑居之日尚淺故云爾耶

聞旁舍呻呼就之曰我某郡人也

察君長者且死願以骸骨屬君因指橐中黃金十斤曰

以是交長者規許諾敬負其骨千里并黃金置死者家

大驚愧之因請獻金如亡兒言以為許君壽規不顧竟

去聞者益以為長者以子故贈大理評事邈少仕江南

為監察御史李氏國除以族北遷獻其文得召試為汲

縣尉冠氏主簿二歲縣民七百人詣京師願得以為令  
遷校書郎知縣事數上書太宗論北邊事時趙普為相  
四方奏疏不可其意者悉投二甕中甕滿輒出而焚之  
獨稱逖為能曰其言多與我合後以太常卿知鼎州州  
雜蠻蠻喜攻劫少年百餘人私自為名號夜出掠逖至  
皆亡入他境約候逖去乃還遷國子博士奉使兩浙江  
南言茶鹽利害省州縣之役皆稱旨出知興元府府有  
山河堰舊溉田四萬餘頃世傳漢蕭何所為乃躬治木

石大修之堰成歲大豐得嘉禾十二以獻遷主客員外郎京西轉運使徙荆湖南路地南接谿洞諸蠻歲出為州縣患逖召其酋諭以禍福迄三歲不以蠻事聞及滿來朝真宗面稱其能會有司言荆南久不治以度支員外郎逖知府事府轄北路兵馬於荆湖為大府故常用大官至逖以材選員外自逖始明年遷司封賜金紫徙揚州州居南方之會仕官於南與死而無歸者家多寓焉子弟恃法得贖出入閭巷為不法至破家逖捕其甚

者答之曰此非吏法乃吾代若父兄教也子弟愧悔稍就學問為善人風俗大化還在道卒遯慷慨能自立於時事母及兄遂以孝謹聞常戒其妻事嫂如姑未嘗敢先其兄食衣雖弊兄不易衣不敢易初違命侯遣其弟朝京師遯友金惟岳當從以家屬託遯惟岳果留不返遯善撫其家為嫁其女數人李氏國亡遯乃載其家北歸以還惟岳

蔡君謨為遯弟迴作傳云金惟岳以文詞名江南迴與之善惟岳常從後主弟朝京

師俱留不遣金陵平迴奉惟岳之族歸汴即謂此也至迴為惟岳取其子自見迴事中 歷官四十



年不問家事好學喜孫吳兵法初在江南數上書言事  
得校書郎遂遷侍御史王師圍金陵李氏大將李雄擁  
兵數萬留上江陰持兩端李氏患之以謂非逖不能召  
雄逖走上江以語動之雄即聽命已而李氏以蠟書止  
雄於溧水逖曰此非柵兵之地留之必敗乃戒雄曰兵  
來勿動待我一夕吾當入白與公兵俱入城逖去王師  
挑之雄輒出戰果敗死逖至收其餘卒千人而去以子  
贈至工部侍郎五子恂恢怡元平恂黃州錄事參軍恢

虞部員外郎怡太子中舍簽押淮南節度判官廳公事  
元最顯平字秉之與兄元相友愛稱天下少卓犖不羈  
善辨說亦與元俱以智畧為當世大人所器寶元中朝  
廷開方畧之選以招異能陝西大帥范文正公鄭文肅  
公皆以平所為書薦召試為太廟齋郎調海陵主簿多  
薦其有大才可試以事者平亦慷慨自許欲有所為未  
及用嘉祐中卒年五十七子瓌璋琦琳璋真州司戶參  
軍琦太廟齋郎自恂至平皆孝友如其先人故士大夫

論孝友者歸許氏

許承旨

許承旨迴字光遠逖之弟南唐時士以權利輿服相夸  
迴獨好擊劍負氣以貧事母不少屈王師伐金陵逖為  
光慶殿使分護北城迴以光慶殿承旨從攻益急矢集  
如雨逖被重傷戒迴曰我將死主矣汝歸慰吾親迴以  
身蔽逖逖罵曰君親忠孝我與汝均有不可乎迴乃去  
及逖歸朝為冠氏令部役築魏城賊李潛者號強桀所

過標掠入冠氏問令在否曰令魏城下獨其弟迴在耳  
潛曰吾固聞許迴之為人即領徒去迴兄弟既載金惟  
岳之族於京師惟岳有子先因亂失所之後聞淝水鉅  
盜李某俘以為己子李日殺奪道上州縣莫能禁惟岳  
泣謂迴曰吾且死誰當收之惟公為能出吾子迴時在  
魏徑之淝水將至盜二人遮刺之迴曰李氏若豪雄欲  
殺義士者無所事勿盜驚止迴前泣謂曰汝所俘者吾  
兄弟子也吾聞義者哀人之急而勇者明己以信汝豈

効草間無知輩耶盜迎舍迴厚飲食之還金氏子當是  
時迴以節勇聞河北大官屢欲薦之於朝迴曰寧能浮  
游江淮不能就刀尺間以活竟終淮上年五十八迴及  
二兄皆孝友王荊公稱之以為迴事母如逖之孝事兄  
如逖之為弟蓋慷慨有大義者子會為進士方壯時亦  
慨然好議天下事後為太廟齋郎

謝諫議

謝諫議泌字宗源歙縣人自言晉太傅安二十七世孫

少好學有志操賈黃中一見竒之謂人曰此子材器不  
羣異日當顯名於時登進士第知龍州青川綿州彰明  
縣三遷殿中丞代還獻所著文二十篇古今類要三十  
卷召試中書以本官直史館賜緋時言事者衆詔閣門  
非涉僥望乃許受泌抗疏陳其不可又乞依唐分經史  
子集為四庫人掌其一太宗嘉之遂以泌兼知集庫淳  
化中王禹偁請羣官謁宰相須朝罷於政事堂樞密使  
於都堂皆同時接見以防請託泌以為若此是疑大臣

以私也夫以萬幾屬任輔臣非接見賓客何以究知外事若止都堂候見而咨之曾無解衣之暇古人云疑則勿用用則勿疑設若杜公堂謁見之禮豈無私室塞相府請託之漸豈無他徑上覽疏嘉歎從之仍以疏送史館會脩正殿泌以為不當施采繪亟命代以丹堊且獎其忠蓋拜左司諫賜金紫并賜錢三十萬嘗對便殿上稱其狂直敢言泌奏曰陛下從諫如流故臣得以自竭昔唐末有益昌圖者朝上諫疏暮不知所在詩人鄭谷

為詩閔之前代如此安得不亂上動容久之後為虞部  
員外郎兼侍御史知雜事上元觀燈特預召自是為例  
未幾為三司鹽鐵副使時外舅魏羽為使以親嫌換度  
支副使真宗即位改主客郎中知虢州在郡上疏以為  
致太平無出姚崇所獻明皇十事臣記雍熙末年趙普  
嘗以此獻先帝深以為然俄命普入相尋普病北狄擾  
邊未及施行今北狄已息繼遷請命正是行此十事就  
太平之日至於省不急之務削煩苛之政不用小人不



與奔競之流以官爵開直言之路此皆致太平之術陛下十行其八九矣又繼遷小有不恭不足深責平城之事至弱也漢祖行之以安天下近代石晉用景延廣之言以絕和致天下橫流豈得為強聞彼所貪嗜者禽色利欲漢祖明皇所用之計正可以弭敵心又自古輔佐聖明建萬世之基立不拔之策者未有不由宿舊大臣未聞市井之徒塵走之吏能為之也願陛下察此則纖人不敢萌心大賢得以畢力矣疏奏上頗嘉歎後知福

州代還民刻石於所經之橋名曰去思泌名知人少許  
可平生薦士曾不過數人後皆至卿相每欲發薦牘必  
設几案置章其上望闕再拜曰老臣又為陛下得一人  
王文正公旦即其所薦也知襄州日鄧城令張逸有善  
政縣去州十餘里泌暇日乘小車從數吏渡漢水至鄧  
城界以觀風謠或載酒邀逸野飲吟嘯終日而去薦逸  
官至樞密直學士為時名臣西祀還授泌右諫議大夫  
判吏部銓盥沐巾褐端坐而終身不歌側時年六十三

歸葬鄉里錄其子行為太常寺奉禮郎銜為將作監主簿

張密學

張密學秉字孟節太平興國中試進士儀狀豐麗屬詞敏速美書翰太宗嘉之擢置第二出入中外累厯要職為度支員外郎知制誥同判吏部流內銓唐故事首曹罕兼制多退為行內諸曹遷首曹自此始後知河陽澶滑二州真宗北巡迎謁境上俾預從官侍食駕還召歸

東封詔與知制誥王曾訪問所過耆老送閣門引見并具州縣繫囚所犯聞奏祀汾陰為留守判官時向敏中以尚書為留守秉出入與之聯騎少所撓抑時議以為非後以樞密直學士再知并州將行上作五言賜之卒年五十六錄其二子通遯竝為大理評事秉好潔輿服飾飲膳以詫賓客家貧質衣以給其費人頗譏之

小魏太尉

小魏太尉瓘字用之以蔭補校書郎為開封府倉曹參

軍會上元與內侍督作燈山而內侍誅索擾人璫密以狀聞詔為杖內侍於省中監襄邑稅門人魏綱上章詆天書流海島璫亦坐停官後知衡山縣衡山祠旁舊禁採伐而寺僧倚中貴人輒犯禁無敢問璫捕送於州州將依違不為決璫疏不已卒抵以罪歷提點廣西刑獄轉運使溪洞婦人緣逋責沒邕州為庸使者二千餘人悉還之劉鋹時舟船皆計口有稅而雷化廉高竇五州獨未除璫為除其稅罷柳州無名之役四百人後以太

常少卿知廣州廣素無城為築城環之又疏江東門鑿東西澳為水閘及儂智高入寇圍廣州五十日不能下朝廷以為功時瓘方知越州特遷工部侍郎集賢院學士使復知廣州給禁卒五十得便宜從事代還糾察在京刑獄時議開六塔河而塞商湖北流瓘往視之以為不可其後決河卒不可塞而德博之民大罹昏墊五溪蠻叛除龍圖閣直學士知荆南朝廷方議征討瓘以為五溪之險師行鳥道而諸將貪功生事非國家之利條

三策招安為上守禦次之攻守為失不報後卒招安之  
以吏部侍郎致仕卒贈太尉年七十一子續纁絳紘紳  
純綢綸紀紹綽綸以才擢守吉州紹字承之以父任為  
將作監主簿嘗知虞城縣禁捕博而盜止留守下其法  
管當合流鎮歲大饑度請報不及事乃先發廩後以聞  
旁近賴之通判絳州行州事新廟學具師徒士故沈浮  
俗間檄縣諭出之講試以時紹與其屬過焉後以右朝  
散郎知嘉州自唐開元獻荔子而近世樂用朱梲所產

久益微不給求而刑者衆嘉祐中有賢守哀之作二詩  
刻石以諷紹將行貴要多求者摹其石詩以報黥賈奪  
人鹽井更數守訟不決紹刑而還之為人孝友和審不  
受私居無子弟過出有吏能常有勞再登格而賞不及  
亦不自言紹聖初卒子汶

查賢良

查賢良道字湛然與陶同祖父元方以蔭歷殿中侍御  
史太祖平江表元方隨李煜納款為滑州掌書記道器



量弘偉趣尚平淡至性慈孝動遵禮法在滑州母病綿  
惓調進藥劑經旬不解帶母思鰕魚方冬市無有道泣  
禱於河鑿冰解衣取之得鰕尺餘以饋母疾尋愈居喪  
絕酒肉盛寒布衣徒跣杖而後能起太宗遣使採訪川  
峽知州通判能否多不稱者唯李虛已薛顏邵曄及道  
等七人被詔獎諭咸平四年擢賢良方正能直言極諫  
對策第一移左正言直史館京東漕運使真宗喜談經  
嘗命馮元講易謂曰朕不欲煩近臣久立欲於齊亭閣

選純孝之士數人止如同人便裘頂帽橫經竝坐暇則  
薦茗果盡笑論削去進說之儀遇疲則罷元薦道及李  
虛已李行簡三人虛已母喪明醫者曰浮翳泊睛能舌  
舐千日者可勿藥自愈虛已舐之二年遂復明行簡父  
患癰痛楚行簡吮之敗膏不唾於地父疾亦愈上立召  
之日令陪侍喜曰朕得朋矣將祀汾陰命道權判留司  
尚書都三館道求扈從以杜鎬代之天禧二年以龍圖  
閣待制知虢州卒年六十二道為人輕財重義初就試

貧不能上道親舊斂錢三萬遺之道出滑州過父友呂  
翁家翁喪無以葬母兄將鬻女以辦喪事道傾素悉與  
之且為嫁其女是歲罷試時人以比郭代公又有同僚  
死女為人婢道贖之以嫁士族在官雖俸入豐厚分給  
宗族孤寡為畢嫁娶者十餘家以是常匱乏所至務寬  
恕胥吏有過未嘗笞罰民有訟捕負者或出已錢償之  
嘗出案部路旁有佳棗從者摘以獻道即計直挂錢於  
木有文集牋表行於世

安定先生孝行錄稱詣黃河禱  
祝垂釣獲魚而范蜀公蒙求及

玉壺清話皆言鑒冰得之今從蜀公說又安定稱字真之蜀公兩處皆言字湛然云

### 俞待制

俞待制獻可字昌言歙縣人其先居河間晉永嘉之亂徙新安端拱初登第歷歸州軍事推官權領州事會李順反川峽官吏多有棄城城中老幼亦亡去獻可料州兵屯沿江柵以遏奔者不能禁得亡命二人斬以徇衆乃定後以御史中丞王嗣宗薦為監察御史建言天下所上瑞物不在圖牒者毋得以聞歷提點廣西刑獄初

撫水蠻數內寇獻可以為前守吏姑息之過請發兵窮討之丁母憂特起為轉運使卒平定之為立互市築塞以扼其險自是蠻人不復犯邊推功官屬未嘗自言仁宗時擢龍圖閣待制權吏部流內銓子希甫希孟皆登第希甫終和州推官希孟皇祐中殿中侍御史希孟孫正圖復登政和五年第云

俞侍郎

俞侍郎獻卿字諫臣獻可之弟始學師友其兄彊力敏

給以儒術自任後遂相繼成進士名聞當世調芍陂尉

仁廟諸臣傳云安豐尉而劉元父為作誌云芍陂

臨事明察善鉤人情推顯至

於隱以故盜不敢發發又輒得有僧積財甚厚其徒有  
告其出遊者獻卿揣其有姦曰吾與而師善不告而去  
何也告者色動因執之得其所瘞尸一縣大驚調昭州  
軍事推官陳進亂嶺南轉運使以象州守儒不任事檄  
獻卿往護之及至守已謀棄城遂止之教堅壁治兵守  
得免誅賊亦不至部昭民往輸之粟及事平議留昭民

伐山林以治官府獻卿曰役病矣不可示信請期三日  
許之民知不久役皆勸功趣事事如其素初昭州積錢  
巨萬獻卿盡用以糴穀至是賴以供軍陳進平上功第  
一仁宗即位轉侍御史為三司鹽鐵判官上言天下穀  
帛日益耗物價日益高民力安得不屈今稻苗未生而  
和糴桑葉未吐而和買轉運使務刻剝以增其數歲益  
一歲又非時調率營造一出於民是以物價積高而民  
積困也嘗以景德中西戎內附北使通好最盛之時一

歲之用較之天禧五年官吏要冗財用羸縮色役多寡  
釋道增減其利害較然可知况自天禧已來日侈一日  
又甚於前夫卮不盈者漏在下木不茂者蠹在內陛下  
宜知其有損於彼又鑒其無益於此與公卿大臣朝夕  
圖議而極之則天下幸甚上納其言為罷諸宮觀清衛  
兵省浮屠老子祠醮及佗無名之費以巨萬計淮浙鹽  
歲耗十三萬尚書經費不足命往視之至則條廢舊弊  
以新法從事吏盡償所負又增五百萬石會兄為鹽鐵



副使乃徙開封府判官時陝西兵食不足方擇轉運使宰相數進擬無合意者因言獻卿天子識其名曰是前使淮南者可其奏至部三日得半年之儲終歲餘二年食雖一切方畧然民不以為病涇原塞外武延川本羌地諸將欲為已名請築堡鑿壕獻卿奏以為不可許未幾寇果至殺掠將士塞所鑿壕而去徙京西因入對言將帥范仲淹明鎬可大用及條上邊策甚備後以集賢院學士知杭州嘗因暴風江湖溢決隄勢不可禦獻卿

大發卒鑿西山石作隄數十里民便之賜書褒諭元昊  
叛西邊大擾獻卿時知宣州詔問所欲施行條上十餘  
事朝廷稱其知時務晚以工部侍郎告老轉刑部致仕  
獻卿為人高明剛嚴論議立規矩似不能容物至持獄  
平易不妄有所輕重其在京西錢丞相為許州厚賓客  
之奉歲費千萬執政素不悅且疑其有私會獻卿奏事  
至京師因開端問之獻卿對無他世以為長者卒年七  
十六子希楚司門員外郎希元進士及第早卒希及虞

部員外郎希旦登第終朝議大夫而希楚子叔良獻卿族孫師錫師錫弟之子舜凱皆登第師錫官朝奉大夫凡俞氏登第者十人顯者甚多

洪比部

洪比部湛字惟清休寧人世仕江表湛幼好學十歲能屬文未冠錄所著十卷號韶年集以進士有聲於時雍熙二年廷試見黜真宗既賜進士梁顥以下百七十九人第翌日詔殿前不合格及南省不奏名進士內文采

可取者令再試帝復御崇政殿內出廷燎賦淡交如水  
詩得湛以下七十六人竝賜及第以姓名附本等湛以  
文采適麗特升第三人後以右拾遺直史館賜緋坐與  
宋沆等上書忤旨落職知容州累遷比部員外郎移知  
郴舒二州咸平二年召試皇帝孝德頌詔復歸館判三  
司都磨勘司知制誥同知貢又修起居注坐知貢日受  
賄除名流儋州移惠州道卒年四十一詔以子幼給錢  
一萬官為護喪歸後以為例

仁宗諸臣傳云任懿以銀二百五十兩賂王欽若登

第後被告上方顧欽若厚懿更云湛湛使陝西還而獄已具官收湛賊家無所有乃以所假梁顥白金器輸官人多湛美風貌俊辯有才幹方議修綏州宰執向敏中冤之湛贊成之而呂蒙正王旦以為不便使湛馳驛相視條奏七利二害卒修之凡五使西北採訪邊事上甚眷待有意擢任之預曲宴賦詩深被賞激有集十五卷

聶內翰

聶內翰冠卿字長孺歙縣人

冠卿傳云師道葬歙州遂為州人按問政先生傳師

道家世在歙但沒於七世祖師道楊行密版奏號問政揚州自揚州歸葬耳

先生鴻臚卿父致堯登咸平三年第贈禮部尚書冠卿  
登第為連州軍事推官秩滿以文謁翰林學士楊億大  
器賞之於是大臣交薦召試學士院入館閣校勘仁宗  
時累歷中外遷工部郎中景祐中李照改定大樂引冠  
卿為檢討雅樂制度故實官別詔與馮元宋祁修撰樂  
書為景祐廣樂記又以警嚴一奏曲不應再用乃製奉  
禋歌以備三疊詔冠卿及照造辭以配聲下本局歌之  
是年郊祀遂用焉冠卿特遷刑部郎中直集賢院後為

賀契丹生辰使其主謂冠卿曰君家先世奉道子孫固有昌者嘗觀所著蘄春集歌詩極清麗因自擊毬縱酒命冠卿賦詩康定二年入翰林為學士丁母憂起復兼判昭文館未幾兼侍讀學士冠卿每進讀左氏春秋必引尊王黜霸之義以諷一日墜笏既退上顧問內侍曰冠卿清羸如何也對以居喪毀戚所致乃出禁中湯劑賜之因告歸營葬至揚州卒詔以其弟太常博士世卿通判宣州後又以宋卿為校書郎冠卿嗜學手未嘗

釋卷有蘄春集十卷河東集三十卷子友仲平仲儀仲  
文仲公仲慶厯二年友仲以正字升親民任使平仲文  
仲竝以太廟室長升正字儀仲熙寧中虞部員外郎通  
判衛州四年十二月判大名府韓琦言王拱城危急儀  
仲抱疾馳赴總徒修築因此病亡特賜絹百疋文仲子  
循矩登元豐中第世卿天聖中進士皇祐中為職方員  
外郎知萊州會通判井淵為盜所擄御史以為言世卿  
坐降知信陽軍後終太常少卿子武仲南仲微仲恭仲



武仲登皇祐中第

許待制

許待制元字子春世以孝謹稱鄉里父亡一子當官兄

弟相遜久之曰吾弟才後必庇吾宗乃以元補郊社齋

郎

魏泰東軒筆錄云王章惠公隨知揚州許元以士子上謁自陳唐許遠之後章惠率同僚上表薦其忠烈

之家乞朝廷推恩通判以下皆不從章惠遂獨狀薦之朝廷以為郊社齋郎而歐陽公為元銘誌稱得父官故

從

徙廣陵力耕以養母歷泰州軍事推官戍軍千人自

海上亡歸州守聞變不知所為詰其所以來三人前對

元叱左右執之曰惑衆者此爾其餘何罪勞其徒而遣之遷鎮東軍節度推官知丹陽縣縣東練湖決水一寸為漕渠一尺故法盜決湖者罪比殺人會歲大旱元請借湖水溉民田不待報決之守遣吏按問元曰便民罪令可也竟不能詰所溉萬餘頃歲乃大豐再遷太子中舍監揚州博鹽和糴倉知如臯縣所至民愛思之為吏喜修廢壞其術長於治財自元昊叛河西兵出久無功天下勞弊三司使薦元材命主權貨元言先時賈人入

粟塞下京師錢不足以償故錢償愈不足則粟入愈少而價愈高是謂內外俱困請高塞下之粟下南鹽以償之使東南去滯積而西北之粟盈此輕重之術也行之果便是時京師粟少而江淮歲漕不給大臣以為憂叅知政事范仲淹謂元獨可辦乃以為江淮兩浙荆湖發運判官至則治千艘浮江而上所過州縣畱三月食其餘悉發而州縣之廩遠近以次相補不數月京師足食乃考故事明約信令發斂轉徙至於風波遠近遲速賞

罰皆有法凡江湖數千里外談笑治之不擾而用以足  
先是官造船多虛破釘鞠已入水不可稱盤乃取新船  
焚之火過得其釘鞠之數校所破纔十之一自是立為  
定額其處事精密如此初以殿中丞為判官已而為副  
為使每歲終會計來朝上必加恩禮再遷尚書金部員  
外郎數求解職上謂輔臣曰發運使總六路州軍八十  
有一其財貨調用幣帛菽粟歲千百萬宜得人久任今  
元累章求解朕思之不若獎勵以盡其材賜進士出身

除侍御史遷工部郎中天章閣待制凡在職十三年乞  
郡至八九乃以知揚州歲餘徙越州泰州嘉祐二年卒  
年六十九先巡江淮歲漕京師者常六百萬石其後十  
餘歲歲益不充至元為之歲必六百萬而常餘百萬以  
備非常逮去職有勸元進為羨餘者元曰吾豈聚斂者  
哉為人善談論與人交久而益篤居家孝友所得俸祿  
分給宗族無親疎之異子宗旦揚子縣主簿宗孟守將  
作監主簿

## 許長官

許長官俞字堯言父遂善事母里母勵其子輒曰汝獨不慙許伯通乎祥符中封泰山加恩羣臣仲父逃當遷以讓遂乃以遂為將作監主簿俞風貌魁傑襟局峻整尚節槩不妄交游下筆立言慨然有濟世意述器之曰吾家千里駒也少喪母事父以孝謹聞所欲雖千里必致後以貢如京師安輿扶持僦居都下俞與妻子同糲糲晨夕進饌必珍厚公卿聞者率俸佐之父年垂八十

謂俞曰觀汝登科吾沒無憾矣祥符七年果登第授汾陽從事歸有日父疾篤俞晝夜供侍澣濯必親或問之俞言幹濯於家人之手慮其厭也居喪毀幾滅性家貧假貸終大事或厯父所經由涕泣永日嘗寄泊揚州通津佛舍方春閑室靜坐未嘗出偶過琅山別院馬上忽泣下僕問其故曰我父嘗寄處此也士流服其孝服滿詔超資授揚州從事嘗知大冶縣縣人至今稱之二子均埊為進士

呂狀元

呂狀元湊字濟叔曾祖裕贈兵部尚書祖文膺官至太  
子左贊善大夫父士元字佐堯咸平二年擢明經為醴  
陵尉歷彭原四會太和隴城縣令為人剛介有節長於  
為政醴陵太和皆大邑民喜鬪訟往往因事申吏以法  
吏多不免士元日與長吏爭曲直下為邑民伺候終無  
毫髮過失可得民卒愛思之四會近海俗雜蠻夷士元  
尤知其人利害事所經決後有欲輒改更者民必自言



於庭曰此呂君所決豈可動耶後人亦莫能改也入仕三十餘年以一縣令之祿衣食其族四十餘口雖薄而必均生淵泰宗淇淵登進士第嘗為秘書丞泰景祐五年試進士為第一授將作監丞康定中獻其所業召試學士院賦及詩三入上等除著作郎中直集賢院至和中以翰林侍讀學士知徐州當辭特命於資善堂賜宴以餞之仍詔自今由經筵出者以為例時蔡襄韓絳皆相繼出守而歐陽修賈黯亦求郡知制誥劉敞疏論邪

正進退之分正臣常難進而易退邪臣反是呂溱蔡襄  
歐陽修賈黯韓絳皆有直質無流心議論不阿有益當  
世誠不宜許其外補使四方有以窺朝廷啓姦幸之心  
而殿中侍御史趙抃亦上言近日正人賢士紛紛引去  
憂國之士為之寒心上悟頗畱修等溱嘉祐三年知和  
州坐言者奪職分司南京熙寧初擢為樞密直學士給  
事中卒神宗手詔曰呂溱立朝最孤知事若之節絕跡  
權貴故中廢十數年無人冒為達之者朕近擢領要務

頗著風績今忽淪亡甚可嗟悼又溱家貧一子幼駭可  
令常賻外量與優給及一行葬事官為辦集庶示將來  
以勵臣節贈禮部侍郎溱為人喜自貴重知杭州日接  
賓客不過數語時人目為七字舍人開敏善議論一時  
名人多推許之

孫工部


孫工部抗字和叔黔縣人其先棄廣陵以避孫儒之亂  
抗少孤力學寄食浮屠山中步行偕書數百里升樓誦

之而去其階數年具衆經遂博極羣書為文操筆數百  
千言始同學究出身歷官後登進士甲科知潯州當是  
時人未趨學抗改作廟學召吏民子弟秀者親據案講  
說勸誘以文藝未幾旁州士皆來學學者由此遂多以  
選通判耀州兵士有訟財而不直者安撫使以為直抗  
爭之不得乃奏決於大理大理以抗所爭為是用其議  
編於勅慶曆二年擢監察御史裏行奏彈狄青不當沮  
敗劉滬永洛城事又因日食言陰盛以後宮為戒仁宗

大獵於城南衛士不及整而歸以夜明日將復出有雉  
隕於殿中抗奏疏即是夜有詔止獵蠻唐和寇湖南以  
抗按撫奏事不合因自劾乃知復州後稍遷都官員外  
郎提點江南西路刑獄有言常平歲凶當稍貴其粟以  
利糴本者抗言此非常平本意也詔又從之儂智高反  
抗即出兵二千於嶺以助英韶會除廣西轉運使馳至  
所部而智高方煽上遣大臣部諸將兵數萬擊之方時  
搶擾抗驅散亡吏民轉芻米又以餘力督守吏治城修

械屬州多全而師飽以有勞遷司封初抗請斬大將  
之比者發騎軍討賊及後賊所以破滅皆如其策卒年  
五十六官至工部郎中抗為州務整齊大體闊畧細故  
與賓客談說絃歌飲酒往往終日而罷聽用僚屬盡其  
力事以不廢在御史言事計曲直利害如何不顧望大  
臣以此無助自少為文以類集之為百卷子適邈迪适  
邁適從王荊公遊年十四議論著書已驚人登第後終  
永州軍事推官邈嘗為縣令荊公亦稱其好學能文自

迪以下及孫畧皆登進士第



新安志卷六

一十三匹

酒稅

酒以紹興十三年所收為額計七千四百九十三貫六百三十文商稅熙寧十年收一千四百三十六貫七百二十九文今以紹興九年所收為額計二千六百五十九貫二百八十文

城社

城周五里其坊七曰崇賢崇仁歸德連城敦里清寧臨



河社在縣西學在縣東紹興二十五年知縣滕齋增建學為一堂二位四齋合三十餘間白州試藝給官田五頃放生池在縣北源通龍陂可數畝

### 官廨

縣廳在城東南隅舊有秋風堂後改為景蘇堂刻蘇公像并三十六詩主簿廳在縣廳西尉廳在東常平倉在東北酒稅務在城東南隅坊場六處河渡無

### 驛亭

良安驛在城東南隅翠眉亭在城西一里元豐中蘇公  
為縣行平岡上見雙嶺如眉勢作亭對之名翠眉且以  
志故鄉峨眉之思亭焚于宣和中紹興六年知縣賈詡  
復新之

橋道

徽溪橋在縣西徽嶺下臨溪橋在縣南三十里路道東  
通昌化西通旌德南通歙縣北通寧國界

山阜

大鄣山在縣東六十里高五百五十仞周百五十里祥符經云即三天子鄣山按郭璞云三天子鄣山在新安歙縣東今謂之王山浙江出其邊此幾是乎舊出銀鉛

唐天寶四年嘗采八年罷今無復有

三天子鄣山鄣或作都故顧野王以

為今永康縉雲山或又以為廬山而婺源靈巖三洞亦以為當之唯此山有鄣名而盧潘亦以為丹陽郡舊名鄣郡者由此蓋自秦鄣漢丹陽郡都尉皆治歙今此山與吳地分界又去故鄣亦不遠然鄣郡有平去二聲此山直作去聲

石金山在東北三十里高六百仞周三十里出衆山之

上相傳為甘露大士道場每夕常顯光相大率如五臺  
廬嶽所見然不知所始宣和二年旱僧元立披榛莽晝  
夜勤苦禱雨於此所見多異由是寢聞元立乃作室於  
山之左脇力田種藥奉香火焉

龍從山在東北二十九里周二十五里其山四合中有  
官道趨寧國縣亦與寧國分界立柵於此今人謂之叢  
山

大葵山在縣北六十里高四百仞周百里舊說以為上

排層漢前壓澄潭蹲形矯首如獒猛犬焉

郎山在東北十五里高二百三十仞周三里亦謂之郎  
嶠山下有郎溪驛路在焉兩旁有石道長數百步直下  
數百尺名翡翠巖不生草木有類石洞云

猗溪山在東北八十里高五百五十仞周百四十里西  
連龍嵒山有水流入縣界

凜山在西北三十里高四百五十仞周十五里

古塘山在西北五十三里高三十五仞周十五里西至

黃石坑與旌德分界

萬山在西北五十三里高四十五仞周十五里東至黃石坑與旌德分界

植山在縣北四十里高五百五十仞周八十里有水西北流十三里入黃石坑

石照山在縣東五里有石高二丈光可以鑑泉味尤甘旁有石照院

徽嶺在西北十里高四百五十仞周三十里舊名大尖

山其上為官道走旌德道也凌曉常行雲氣中

王荊公為江東

提刑時有度麾嶺詩用此旌麾字又有詩云曉度藤溪霜落後夜過輦嶺月明中則又用此輦雉字然太平廣

記載績溪有大徽村又宣和中改州為徽說者以為取此嶺為名則徽字近是

佛論嶺在西北四十里高四百五十仞周四十里祥符經云昔嘗有高僧講論於此故名

### 水源

臨溪水源出縣北三十里又名乳溪西南流七十八里合揚之水方輿記云臨溪石在縣北三里溪岸上其方

二丈其平如砥溪水甚宜浣紗數里婦人悉來浣紗去家既遠遂績其旁以守之春時多麗服羣績於此雖不浣紗者亦會績焉縣名亦兼取此義

徽溪水出徽嶺水分為二其東北流者入旌德界此水入縣經修仁鄉詰曲四十里南入常溪合揚之水入歙縣界

登水出借溪山南流九十里合揚之水入歙縣界溉田二頃



常水出黃蘗山南流五十里合揚之水入歙縣界溉田  
一頃三十三畝

蒼龍洞在縣北十五里山峻拔回顧如立壁中有怪石  
瀑水如簾其下為龍池遇旱禱之有應亦有石可鑑慈  
雲院在其側

祠廟

忠顯廟有二一在縣側一在東七里越國公故城宅井  
在焉梓山廟在東南一里方輿記云初於山下置良安

縣舊有方白石忽化為雙白鳥飛向山遂於山下鳥棲處立廟邑人敬之行立種殖皆不敢背又有將軍廟吳山太婆廟節司徒廟歸善廟溪口廟郎嶸廟並在縣東僧寺

太平興國禪院在良安鄉新合里舊名華嚴院太平興國五年二月勅改

光相院在良安鄉寧泰里舊名寧泰院治平元年十月勅改

清福禪院在惟新下鄉咸化里舊名清塘院治平元年十二月勅改

普照院在仁慈鄉義興里治平元年十二月勅改

慈雲院在仁慈鄉龍泉里舊名慈恩院治平元年十二月勅改

求安院在新安鄉龍興里舊名新恩院治平元年十二月勅改

石門廣福院在遵化鄉石門里舊名石門院熙寧四年

三月勅改為壽聖院隆興中壽聖例改廣福有三廣福

故還以石門別之

按五朝隆平集治平三年詔一應無額寺院屋宇及三十間以上者並賜

壽聖為額以英宗誕聖日號壽聖節故也

廣化院在宣政鄉斜溪里舊名宣化院治平元年十二

月勅改

覺乘院在宣政鄉斜溪里舊名釋迦院治平元年十二

月勅改

靈鷲院在新華鄉幽山里舊名幽山院治平元年十二

月勅改

清隱院在楊山鄉高峰村舊名高峰院治平元年十二月勅改

廬山廣福院在楊山鄉修仁里舊名廬山院其改壽聖及廣福與石門廣福院同時

兜率院在修仁鄉常溪里舊名彌勒院治平元年十二月勅改

正覺院在修仁鄉常溪里舊名菩提院治平元年十二

月勅改

天王廣福院在仁慈鄉義興里舊名天王院改壽聖及廣福如石門廬山同時

崇福院在修仁鄉常溪里唐光化二年建

興福院在修仁鄉守節里唐天寶二年建

新興院在惟新上鄉新安里唐乾符五年建

藥師院在新安鄉永寧里唐天祐二年建

前山院在宣政鄉歸化里唐咸通五年建

義林院在惟新下鄉麟福里天禧三年建

賢宰

蘇轍字子由眉山人自簽書南京判官謫監筠州鹽酒稅元豐八年以奉議郎知縣事適有朝旨江東諸郡市廣西戰馬江東素乏馬每縣不過十餘匹而諸縣括民馬吏緣為姦有馬之家為之騷然公謂尉郭惇愿曰廣西取馬使臣未至事忌太遽徐為之備可也吾邑孰為有馬者尉曰邑有遞馬簿歲月遠矣然有無之實尚得

其半也即取簿封之又曰何從得馬牙人乎曰召諸牙  
詰之則馬牙出矣果得曾為人賣馬者辭以不能曰吾  
不責汝以馬但為我供文書耳曰諾州符日至縣督責  
買馬乃以夏稅過期為名召諸鄉保正副問之曰汝保  
誰為有及格馬者相顧辭不知曰保正副不知誰當知  
者第勿以有為無無為有則免罪矣汝等所具吾將使  
衆人訴其不實而陳其脫畧者不可不實也人知不免  
皆以實告復喻之曰買馬事止此矣廣西取馬者至郡



則馬出若不至則已矣皆再拜曰邑人幸矣然取馬者卒不至哲宗即位除秘書省校書郎終門下侍郎

崔鷗字德符雍丘人父毘有聞於時自雍丘徙陽翟鷗能文工於詩貌瘁氣剛登進士第元符末以頻年四月日蝕詔求直言鷗上書辨司馬溫公力抵時相宰相蔡京使以邪正二等差定上書者列鷗邪下坐廢三十年政和中為績溪縣令後嘗召為殿中侍御史不果拜靖康初擢右正言力疾就職凡三疏論列諫官馮澥及請

斬蔡京病甚乞解官除直龍圖閣管幹西京嵩山崇福宮卒京師有婆婆集三十卷行於世中書舍人晁說之以為前世黃叔度元魯山本朝王子野江鄰幾之流說之頃與鷗同書邪籍者也

黠縣沿革

黠緊縣自秦以為縣屬鄆郡縣居黠山之陽故名或曰黠與鑿同以縣南墨嶺出石墨故也

此據水經及舊唐書而寰宇志又言

置在黠川因名漢改鄆為丹陽郡縣屬如故成帝鴻嘉二年以

黠為廣德王國立中山憲王弟孫雲客於此立三年而  
絕平帝元始二年復以故國立廣川惠王曾孫倫為廣  
德王傳至子赤王莽篡位明年廢而改縣曰愬鹵及漢  
建安之亂縣人陳僕祖山以二萬戶屯林歷吳使賀齊  
攻之僅免遂以歙分五縣與黠為六置新都郡晉太康  
元年更郡為新安而割故廣德王國為廣德縣隸宣城  
郡隋開皇十一年歙州治黠大業中州復為新安郡治  
休寧唐永泰元年平方清因其壘析本縣地及饒州之

浮梁置祁門縣又析本縣及浮梁池州之秋浦置石埭縣及國朝以宣州廣德縣置軍又自析出為建平縣大抵今黟縣祁門池之石埭廣德之廣德建平凡五縣皆秦漢黟縣之故境而今黟則狹矣元和六年九月與婺源皆稱上縣國朝為緊縣

縣境

縣在州西百五十五里東西廣長五十三里南北百十二里東至休寧界五十里西至祁門界二十五里南至

休寧界四十五里北至寧國府太平界五十里東南到  
休寧界四十五里西南到祁門界五十里東北到太平  
界百五里西北到石埭界八十里

鄉里

其鄉四其里二十會昌鄉在縣西北其里連城嘉祥歷  
陽延福蜀里敦義順仁鄉在東北其里古城長寧懷仁  
順化新政鄉在東南其里清德明德魚亭東亭雲巖懷  
遠鄉在西南其里昇平靖節安寧新城豐樂

戶口

天禧中主戶六千二百一十六口萬七千九百七十四  
客戶四百三十三口五百三十七未經界戶萬二千三  
百六十五經界九千四十一乾道主戶五千九百有一  
客戶一千八百六十八

田畝

田畝舊九萬二千一百三十五畝經界為三十三萬四  
千四百三十畝二角五十八步今增十畝竭一百九十

處

租賦

夏稅紬二百二十七匹一丈七尺五寸七分絹二千八百二十七匹二丈五尺八寸二分布六百一十匹六寸一分綿二萬四千二百七十三兩二錢四分小麥五百九十八石一斗一升九合錢二千二貫五百二十三文軍衫布三百四匹二丈一尺秋稅糙米萬三千二百三十五石三斗七升鹽錢五百四十二貫一百三十七文

和買紬一千八百七十五匹絹四千六百八十八匹

酒稅

酒以紹興二年所收為額計九千六百七十五貫三百三十六文商稅熙寧十年收一千二百七十九貫五百八十四文今以紹興十三年所收為額計二千一百貫九百七十二文

城社

縣城周二里三百五十步社在西南學在南



官解

縣廳在城正北主簿廳在其東尉廳在西南省倉常平倉在縣門之內酒務稅務在廳東

鎮場

西武鎮在縣西二十里廂口鎮在西北二十里

縣今無西武只

有廂口鎮在縣內坊場二處

驛道

臨縣驛在縣城內魚亭驛在縣東三十五里道路東南

各通休寧西通祁門北通太平界

山阜

牛泉山在縣北五十七里高九百五十仞東接太平界輿地志云牛泉嶠自山下至頂九里一頓凡有九頓並山為路狹處纔七八寸臨不測之深上嘗風木雖合抱而長不至丈南向乃有之雖盛夏亦須衣襦頂有水方廣丈許冬夏不增減名牛泉相傳舊無水牛以足跑土成池山上往往有古人累石為路處蓋昔往丹陽郡之

道也

武亭山在西南十八里接祁門界高二百仞周五十里  
有水東流入縣界

魚亭山在縣南三十五里高二百五十仞周三十里水  
東流入休寧界方輿記云每歲西江魚船至祁門縣捨  
舟登陸上此山東水次淹流待船故曰魚亭

按黟縣舊有四亭八

墅魚亭其一也方輿所說似  
以為停留之停未知果否

復

扶又

山在縣南三十六里高二百六十仞周二十九

里方輿記云山甚孤峻石壁四絕亦謂之五硯二礫兩邊皆石壇中央有溝纔五六尺許水甚懸迅捫蘿挽葛時有至者山翠激流為羣峰之秀東南水流入休寧界

硯音痕  
礫音樂

林厯山又名頂游山在縣西南十里高三百仞周三十里漢末陳僕祖山所屯

戢兵山在縣北十五里高百仞周十里舊名石鼓山有石鼓石人石驢俗傳石鼓鳴即驢鳴長官不利後鑿其

鼓破之遂不復鳴天寶六年改名戢兵三姑山一名吉陽山在東北十五里高二百五十仞周三十里其山三峰地輿志云三姑山多石三年一遇野火自然燒盡故老相傳號三姑磨云若非磨年百姓放火輒有雨中峰有瀑布新安記云天將雨此山先有鼓角之音  
靄山在縣南十里孤峰如削

### 水源

吉陽水出吉陽山東流至白茆渡入縣界屈曲九十里

經黎陽口合南當水東流三十五里下黃墩村北流四十五里出歛浦合揚之水通舟船溉田四十四頃

章水出縣北十八里章山東南流二十七里至縣界又東南流五里合橫江水溉田十一頃

橫江水出武亭山東南流二十八里合章水入魚亭口溉田八頃

魚亭水出魚亭山東流二十里至魚亭口合吉陽橫江水東流入休寧界

牛泉水出牛泉山東南流八十里至魚亭口合吉陽水  
溉田三頃

釣灘在縣南十八里亦名潯陽臺相傳李太白游新安  
嘗釣於此作詩云磨盡石嶺墨潯陽釣赤魚靄峰尖似  
筆堪盡不堪書

古跡

石墨井在縣南十六里方輿記云墨嶺上出石墨土人  
採之以書採處成井今為水所淙其井轉深寰宇記云

墨嶺上有石特起十餘丈峰若劒峙有靈鼓潛發令長  
每以為候鳴則不利嶺旁竇出石墨可書又新安圖經  
云歲貢柿心墨木黥之字縣職此之由

據寰宇記有石鼓則是前戢兵

山矣又云墨嶺山上有穴中有墨石軟膩土人取為墨色甚鮮明可以記文字按今石墨嶺墨極麤爛乃未聞採以書者用以染卑色深而香不假他物也

樵貴谷方輿地志云黥縣北緣嶺行得樵貴谷昔有人  
山行七日至一斜穴入穴廓然周三十里土甚平沃中  
有十餘家云是秦時離亂入此避地又按邑圖有潛氏



村事已見第一卷

僕城里在林厯山下以陳僕所屯為名俗說每社日僕則遣人掠酒肉村人苦之遂以社之明日為社至今猶然

獨母柴在縣南十五里昔有寡婦死無以葬村人為覆以薪後人行經其處者皆以一枝草投之迄今不絕

祠廟

土地廟石將軍廟頂遊廟在縣西橫江廟靄山廟復山

廟在縣南城隍廟戢岳廟五郎廟在縣北石孟廟在西  
北祥符經所載今又有吉陽廟在縣東噎潭廟在東南

道觀

靈虛觀在西南一里舊名洞靈觀崇寧四年九月勅改

僧寺

廣安寺在會昌鄉嘉祥里舊名永寧寺梁大同元年建  
大中祥符元年勅改

遵孝寺在會昌鄉延福里舊名石孟崇福院唐天復三

年後改

延慶院在新政鄉魚亭里舊名阜口院唐大中三年建  
大中祥符四年勅改

子路院在順仁鄉懷仁里唐會昌三年建

霞山院在新政鄉明德里唐大中三年建

精林院在會昌鄉歷陽里唐乾寧五年建

石鼓院在順仁鄉順化里唐會昌五年建

閑居尼寺在縣城內梁大同元年建

縣令

吳茹公者宋黟縣令泰始二年輔國將軍行會稽郡事  
孔凱與潯陽內史行江州事鄧琬等謀反琬先遣新安  
太守陽伯子及軍主任獻子襲茹公茹公固守力不敵  
棄城走伯子等屯據縣城茹公與臺軍主丘敬文李靈  
賜蕭伯壽等攻圍彌時八月乃克斬伯子獻子二人首  
何思澄字元靜東海郟人梁天監中遷治書侍御史時  
始重此選車前依尚書二丞給三騶執盛印青囊舊事

糾官印綬在前故也久之遷秣陵令入兼東宮通事舍人昭明太子薨出為黟縣令

庾仲容字仲容潁川鄆陵人除尚書左丞坐推糾不直免仲容博學少有盛名頗任氣使酒好危言高論唯與王籍謝幾卿情好相得二人時亦不調遂相追誕縱謀飲不復持檢操久之復為諮議參軍出為黟縣令

薛稷蒲州汾陰人唐文學館學士收之從孫少擢進士入官後坐法左遷稍轉黟令今有薛公祠廣德二年所

立其文可辨者贄賦平而邑里有革苦窳息而山谷知  
謹云稷官至太子少保又有李子稱者汝陽王璵之孫  
袁藹者東郡陽夏人皆唐世為令者

汪澥字仲容涇縣人汪氏系本黟歙而宣城相去為近  
不知其先於黟歙何別也幼從安定先生質易中疑義  
又從王荊公遊首傳其經說太學初成選為錄神宗書  
其名屏間年四十餘始登第後知黟縣專用靜治教條  
可法常摘偽券及築長堤除水害至今為邑人所紀終

大司成顯謨閣待制

新安志卷五



欽定四庫全書

新安志卷六

宋 羅願 撰

叙先達

昔者春秋之世楚屈建之信聞於諸侯其大夫誦之以為晉卿不如楚意楚之賢晉無以當之至建問晉范會之德於趙武武告以夫子之家事治無隱情於國無愧辭於鬼神者建退而誦之則晉先賢之風烈建曾不足以得其萬一逮魯叔孫豹聘於晉則又以為晉范氏之

先僅可謂之世祿而魯有先大夫曰臧文仲者既沒而  
言立然後可以謂之不朽由此言之世之賢者可有既  
乎是數者不惟其人之差品固若是亦習於所聞各以  
其國之賢為足以矜於天下也夫賢之所在人猶以其  
於已為近而矜之又况善行之發於吾身而令聞之施  
於吾體者乎榮亦至矣然則進德脩業又安可後哉新  
安自程靈洗以節顯梁陳間唐及五代相繼有人迨聖  
宋則名臣輩出夫豈惟其土之多賢要當以世論之若

梁員外散騎侍郎李祿太常卿胡明星唐中書舍人吳  
輦南唐宰相馮延巳勤政殿學士延魯樞密使查文徽  
國朝尚書郎舒雄太子左贊善大夫呂文膺虞部員外  
郎方演及近世名卿大夫未得其行狀者皆不敢輕有  
所附著以存蓋闕之義前世羽林將軍盧元卿刑部郎  
中程皓則又不知其世謹錄知者見其左

程儀同

程儀同靈洗字元滌海寧人侯景之亂保黠歛以拒景

梁元帝授譙州刺史資領本郡太守後助王僧辯鎮防

及武帝誅僧辯靈洗率所領來援其夜力戰於石頭西

門軍不利遣使招諭久之乃降

按陳書只云軍不利謂靈洗軍也而南史云武

帝軍不利今從陳書

帝深義之授蘭陵太守仍助防京口及平徐

嗣徽有功除南丹陽太守封遂安縣侯後隨周文育西

討王琳軍敗為琳所拘尋與侯安都等逃歸累遷太子

左衛率武帝崩王琳前軍東下靈洗於南陵破之擄其

兵士并獲青龍舟十餘乘以功授都督南豫州刺史侯

瑱等敗王琳於柵口靈洗乘勝逐北據有魯山召為左  
騎將軍天嘉四年周逵重寇臨川以靈洗為都督自鄱  
陽別道擊之逵又走山谷間遷中護軍出為都督郢州  
刺史廢帝即位進號雲麾將軍華皎之反遣使招靈洗  
靈洗斬皎使以狀聞朝廷深嘉其忠為增守備給鼓吹  
一部因推心待之使其子文季領水軍助防時周將元  
定率步騎二萬助皎圍靈洗靈洗嬰城固守及皎敗乃  
出軍躡定定不獲濟江以其衆降因進克周沔州禽其

刺史裴寬以功改封重安縣公靈洗御下嚴刻士卒有小罪必以軍法誅之然號令分明與同甘苦衆亦以此附焉性好播植躬耕稼別水陸所宜刈穫早晚雖老農不及伎妾無游手竝督以紡績至於散用貲財亦無所吝卒贈鎮西將軍開府儀同三司謚忠壯配享武帝廟庭

程都督

程都督文季字少卿幼習騎射多幹畧果決有父風弱

冠從靈洗征討必先登陷陳靈洗與周文育侯安都等  
敗於沌口為王琳所執武帝召陷賊諸將子弟厚遇之  
文季最有禮容深見賞文帝嗣位累遷新安臨海太守  
尋乘金翅助父鎮郢城華皎平文季父子竝有捍禦之  
功及靈洗卒文季盡領其衆起為超武將軍仍助防郢  
州文季性至孝雖軍旅奪禮而毀瘠甚至服闋襲封隨  
都督章昭達率軍往荊州征梁梁人與周軍多造舟艦  
置青泥水中昭達遣文季潛道戢往盡焚之又夜入其

外城殺傷甚衆既而周兵大出文季僅以身免以功加  
通直散騎常侍太建五年都督吳明徹北討至秦郡秦  
郡前江浦通涂水齊人下大柱為杙柵水中文季前領  
驍勇拔開其柵明年率大軍自後至攻秦郡克之又別  
遣文季圍涇州屠其城進拔盱眙仍隨明徹圍壽陽文  
季臨事謹飭御下嚴整前後所克城壘率皆迮水為堰  
土木之功動踰數萬置陳役人必先諸將夜臥早起迄  
暮不休軍中服其勤幹每戰常為前鋒齊軍深憚之謂



為程虎

陳書云程獸南史云陳彪皆以唐諱虎字故也

以功除散騎常侍帶新

安內史累遷北徐州刺史加都督後隨明徹北侵軍敗為周所囚授開府儀同三司十一年自周逃歸至渦陽為邊吏所執送長安死於獄是時既與周絕不之知至德元年後主始知之追贈散騎常侍詔傷其廢絕降封重安縣侯以子響襲封

### 吳御史

吳御史少微新安人第進士長安中累至晉陽尉與武

功富嘉謨同官友善先是天下文章以徐庾為宗氣調  
益弱獨少微嘉謨屬詞本經學雄邁高雅時人慕之文  
體一變稱為吳富體少微撰崇福寺鐘銘嘉謨作雙龍  
泉及千燭谷頌尤為作者推重并州長史張仁亶待以  
殊禮坐必同榻時魏郡谷倚為太原主簿亦以文詞著  
名時號北京三傑中興初吏部侍郎韋嗣立薦少微嘉  
謨同時為左右臺監察御史少微卧病聞嘉謨死慟哭  
賦詩尋亦卒有文集各五卷谷倚後客死文章遺失少

微子鞏開元中為中書舍人

新舊唐書皆稱少微新安人惟唐御史臺記稱少微

渤海人按祥符圖經亦載少微於歙縣人物中今從之又舊書文苑傳稱吳富文集各五卷經籍志三人集各

卷十

### 王校正

王校正希羽歙州人

凡稱歙州及新安人之類皆據其所出書錄之得其縣者自書縣

詞

藝優博天復元年登第時年七十餘先是昭宗新平內

難聞放新進士詔知貢杜德祥有孤貧屈人宜以名聞

特勅授官故德祥以希羽曹松劉象柯崇鄭希顏應詔

各授校正其制云念爾登科之際當予反正之年宜降  
異恩各膺寵命松舒州人學賈司倉為詩此外無他長  
時號松啓事為送羊脚狀年亦逾七十象京兆人崇希  
顏閩人皆以詩卷及第年六十餘號五老榜

汪處士

汪處士台符歙州人博學能為文好王霸大畧唐末見  
天下方亂乃力耕不出南唐先主輔政移鎮金陵往上  
書陳民間九患先主覽之且加條問為宋齊丘所抑齊

丘始字超回台符貽書譙之曰聞足下齊先聖以立名  
超亞聖而為字齊丘慙改字子嵩後使人誘與飲酒夜  
縛其口沈石城下先主聞而惜之及昇元中更檢校民  
田物產以三等定賦又使民輸粟請鹽罷其科借商旅  
賣鬻則征之過者則否舟行無力勝之稅郡縣吏昏降  
而有限凡數十年民得以小康皆自台符發之台符所  
為碑或  
以管驛巡官九江巡使等冠銜此一時  
祿仕之賤者故依江南野史稱處士

舒狀元

欽定四庫全書

新安志  
卷六

七

舒狀元雅歛縣人幼好學才辭敏贍南唐時以貢入金陵吏部侍郎韓熙載好接誘後進苟有才藝必延致之雅以文贄一見如舊與為忘年交在門者凡數十人推雅為首雅輕黠敏給熙載狎之後主立頗疑北人熙載懼愈肆情坦率家伎百餘人時操獨弦琴使雅執板隨房歌鼓以為笑樂會熙載知貢雅以狀元登第然內外亦無異辭歸朝歷將作監丞太宗於禁中造閣取四庫書數萬卷藏之時秘書監李至因薦雅及杜鎬等入充

校理自太平興國中編纂文苑英華淳化中校史記前  
後漢書至道中脩續通典校定周禮禮記公羊穀梁傳  
疏及別纂孝經論語正義咸平中校七經疏義雅必預  
焉累遷職方員外郎咸平末出守舒州以守職勤恪為  
稱樂其風土有終焉之志秩滿乞致仕就掌靈仙觀雅  
嘗慰薦王欽若後欽若為言大中祥符三年直昭文館  
卒年七十餘弟雄登端拱中進士第官至尚書郎

呂侍郎

欽定四庫全書

新安志  
卷六

八

呂侍郎文仲字子臧新安人南唐時第進士為大理評事歸朝累遷少府監丞預修太平御覽廣記文苑英華轉著作佐郎太宗聽政之暇日閱經史患顧問闕人太平興國八年始以文仲為侍讀尋又為翰林侍讀賜緋魚寓直御書院立本班多以日晚召見出經史令讀或就訪外事時侍書王著書學葛湍亦直禁中文仲以書史著以筆法湍以字學深承顧接至道初上嘗草經史故事三十紙召文仲讀畢因刻石令內侍齎數百本



藏江東名山福地道宮佛廟及分賜高逸不仕敦朴有  
行為州里所稱者真宗咸平二年以楊徽之夏侯嶠及  
文仲竝為翰林侍讀學士邢昺為侍講學士先是侍讀  
名秩未崇及置此職班秩賜翰林學士祿賜如之設直  
廬於秘閣侍讀更直侍講長上日給尚食珍膳夜則迭  
宿日具當直官名於內東門進入召對訪問或至中夕  
中謝日賜與如翰林學士受詔集太宗歌詩為三十卷  
嘗以御史中丞鞠曹南獮民趙諫獄忽御寶封軒裳姓

名七十餘人令窮治皆昔委諫營產買妾者文仲從容  
奏更請察其為人密籍姓名候薦選對揚之日斥之未  
晚從之景德中終刑部侍郎集賢院學士文仲富詞學  
有器韻善應對久居禁近周密詳審嘗使高麗清潔無  
所求遠人悅之每使至必詢其出處時呂端呂祐之亦  
嘗為使三人皆寬厚文雅國主王治嘗對使者劉式語  
及中國用人必應以族望如唐之崔盧李鄭者式言惟  
賢是用不拘族姓治曰何姓呂者多君子也後以其子

士永為奉禮郎姪孫從政同學究出身兄孫湊

### 大魏太尉

大魏太尉羽字垂天婺源人唐鄭公之後

真宗名臣傳云羽自言鄭

公十四世孫按陳無已作魏嘉州銘稱司徒蕃之子別居歛之婺源其後四世而至羽然則羽乃鄭公十世孫

耳初仕江南為昭文館校書郎出為雄遠軍判官今太

平州是也王師渡江道出城下羽歸款轅門太祖聞而

嘉之特拜太子中舍命知興州尋知京兆府屬河間守

將以征賦權酷之入盜為已用遣羽覆實期年得羨餘

以億計因言本州錄事參軍郭震十年未代河間令崔能前為即墨未滿歲而移遷調之司頗未均一太宗以其敢言詔加褒轉後為戶部郎中上疏願省三司職官之半可以責成仍條利病二十事下有司議皆以為便遷鹽鐵最上案判官立位為三司判官之首上以唐世尚臺閣目卿監為冗官欲復古優其選擇諸曹正郎有才望者竝補少卿監以羽為秘書少監嘗請簿計王府僚吏之過乞依唐置封駁司命大臣領之事皆見從上

稱其有心計通明吏道真宗即位歷禮部侍郎卒年五十八以其長子玠為奉禮郎玠卒羽妻自陳家貧無祿錄其子校書郎瓘為奉禮郎後贈羽太尉羽強力善處繁劇在三司出入十八年習知財賦之事

### 查秘監

查秘監陶字大鈞休寧人世仕南唐祖文徽工部尚書陶明習法令仕為常州錄事參軍歸朝太祖命大理試以律學除本寺丞累轉侍御史權判大理寺咸平五年

遷秘書少監復判大理先是中書以朱搏議法不當請用陶真宗曰比聞陶亦深文宰相言當今習熟法令少如陶比者遂可之楊億知審刑院陶屢攻其失遂命代億仍賜金紫卒年五十景德二年以其子前崑山尉慶之為太常寺太祝

張度支

張度支諤字昌言歙縣人能詩有吏才仕江南為秘書丞通判鄂州王師南下與州將許昌裔叶謀歸款太祖

召見勞問賜賚甚厚授右贊善大夫蜀平選知閬州太  
平興國中就除西川轉運使先是中土罕習舟船諤以  
其軍分隸諸州自是無覆舟之患後以三司度支判官  
出為荆湖江浙等道制置茶鹽副使以子秉故累贈太  
子太傅

許司封

許司封逖字景山歙州人

題名碑言許逖祁門人而安定先生為許俞作傳言黟縣

人今從歐陽公所  
作行狀言歙州

唐睢陽太守遠五世孫曾祖儒不義

朱梁自雍州入於江南終身不出祖稠仕江南參德化

主軍事父規嘗羈旅宣歙間

歐陽公言逝世家歙州而許氏家譜乃云規嘗羈旅

宣歙間豈是時僑居之日尚淺故云爾耶

聞旁舍呻呼就之曰我某郡人也

察君長者且死願以骸骨屬君因指橐中黃金十斤曰

以是交長者規許諾敬負其骨千里并黃金置死者家

大驚愧之因請獻金如亡兒言以為許君壽規不顧竟

去聞者益以為長者以子故贈大理評事遜少仕江南

為監察御史李氏國除以族北遷獻其文得召試為汲



縣尉冠氏主簿二歲縣民七百人詣京師願得以為令  
遷校書郎知縣事數上書太宗論北邊事時趙普為相  
四方奏疏不可其意者悉投二甕中甕滿輒出而焚之  
獨稱逖為能曰其言多與我合後以太常卿知鼎州州  
雜蠻蠻喜攻劫少年百餘人私自為名號夜出掠逖至  
皆亡入他境約候逖去乃還遷國子博士奉使兩浙江  
南言茶鹽利害省州縣之役皆稱旨出知興元府府有  
山河堰舊溉田四萬餘頃世傳漢蕭何所為乃躬治木

石大修之堰成歲大豐得嘉禾十二以獻遷主客員外郎京西轉運使徙荆湖南路地南接谿洞諸蠻歲出為州縣患逖召其酋諭以禍福迄三歲不以蠻事聞及滿來朝真宗面稱其能會有司言荆南久不治以度支員外郎逖知府事府轄北路兵馬於荆湖為大府故常用大官至逖以材選員外自逖始明年遷司封賜金紫徙揚州州居南方之會仕官於南與死而無歸者家多寓焉子弟恃法得贖出入閭巷為不法至破家逖捕其甚

者答之曰此非吏法乃吾代若父兄教也子弟愧悔稍就學問為善人風俗大化還在道卒逝慷慨能自立於時事母及兄遂以孝謹聞常戒其妻事嫂如姑未嘗敢先其兄食衣雖弊兄不易衣不敢易初違命侯遣其弟朝京師逝友金惟岳當從以家屬託逝惟岳果留不返逝善撫其家為嫁其女數人李氏國亡逝乃載其家北歸以還惟岳蔡君謨為逝弟迴作傳云金惟岳以文詞名江南迴與之善惟岳常從後主弟朝京師俱留不遣金陵平迴奉惟岳之族歸汴即謂此也至迴為惟岳取其子自見迴事中歷官四十

年不問家事好學喜孫吳兵法初在江南數上書言事  
得校書郎遂遷侍御史王師圍金陵李氏大將李雄擁  
兵數萬留上江陰持兩端李氏患之以謂非逖不能召  
雄逖走上江以語動之雄即聽命已而李氏以蠟書止  
雄於溧水逖曰此非柵兵之地留之必敗乃戒雄曰兵  
來勿動待我一夕吾當入白與公兵俱入城逖去王師  
挑之雄輒出戰果敗死逖至收其餘卒千人而去以子  
贈至工部侍郎五子恂恢怡元平恂黃州錄事參軍恢

虞部員外郎怡太子中舍簽押淮南節度判官廳公事  
元最顯平字秉之與兄元相友愛稱天下少卓犖不羈  
善辨說亦與元俱以智畧為當世大人所器寶元中朝  
廷開方畧之選以招異能陝西大帥范文正公鄭文肅  
公皆以平所為書薦召試為太廟齋郎調海陵主簿多  
薦其有大才可試以事者平亦慷慨自許欲有所為未  
及用嘉祐中卒年五十七子瓌璋琦琳璋真州司戶參  
軍琦太廟齋郎自恂至平皆孝友如其先人故士大夫

論孝友者歸許氏

許承旨

許承旨迴字光遠逖之弟南唐時士以權利輿服相夸  
迴獨好擊劍員氣以貧事母不少屈王師伐金陵逖為  
光慶殿使分護北城迴以光慶殿承旨從攻益急矢集  
如雨逖被重傷戒迴曰我將死主矣汝歸慰吾親迴以  
身蔽逖逖罵曰君親忠孝我與汝均有不可乎迴乃去  
及逖歸朝為冠氏令部役築魏城賊李潛者號強桀所

過標掠入冠氏問令在否曰令魏城下獨其弟迴在耳  
潛曰吾固聞許迴之為人即領徒去迴兄弟既載金惟  
岳之族於京師惟岳有子先因亂失所之後聞淝水鉅  
盜李某俘以為已子李日殺奪道上州縣莫能禁惟岳  
泣謂迴曰吾且死誰當收之惟公為能出吾子迴時在  
魏徑之淝水將至盜二人遮刺之迴曰李氏若豪雄欲  
殺義士者無所事勿盜驚止迴前泣謂曰汝所俘者吾  
兄弟子也吾聞義者哀人之急而勇者明己以信汝豈

効草間無知輩耶盜迎舍迴厚飲食之還金氏子當是時迴以節勇聞河北大官屢欲薦之於朝迴曰寧能浮游江淮不能就刀尺間以活竟終淮上年五十八迴及二兄皆孝友王荆公稱之以為迴事母如逖之孝事兄如逖之為弟蓋慷慨有大義者子會為進士方壯時亦慨然好議天下事後為太廟齋郎

謝諫議

謝諫議泌字宗源歙縣人自言晉太傅安二十七世孫



少好學有志操賈黃中一見竒之謂人曰此子材器不  
羣異日當顯名於時登進士第知龍州青川綿州彰明  
縣三遷殿中丞代還獻所著文二十篇古今類要三十  
卷召試中書以本官直史館賜緋時言事者衆詔閣門  
非涉僥望乃許受泌抗疏陳其不可又乞依唐分經史  
子集為四庫人掌其一太宗嘉之遂以泌兼知集庫淳  
化中王禹偁請羣官謁宰相須朝罷於政事堂樞密使  
於都堂皆同時接見以防請託泌以為若此是疑大臣

以私也夫以萬幾屬任輔臣非接見賓客何以究知外事若止都堂候見而咨之曾無解衣之暇古人云疑則勿用用則勿疑設若杜公堂謁見之禮豈無私室塞相府請託之漸豈無他徑上覽疏嘉歎從之仍以疏送史館會脩正殿泌以為不當施采繪亟命代以丹堊且獎其忠蓋拜左司諫賜金紫并賜錢三十萬嘗對便殿上稱其狂直敢言泌奏曰陛下從諫如流故臣得以自竭昔唐末有益昌圖者朝上諫疏暮不知所在詩人鄭谷

為詩閔之前代如此安得不亂上動容久之後為虞部  
員外郎兼侍御史知雜事上元觀燈特預召自是為例  
未幾為三司鹽鐵副使時外舅魏羽為使以親嫌換度  
支副使真宗即位改主客郎中知虢州在郡上疏以為  
致太平無出姚崇所獻明皇十事臣記雍熙末年趙普  
嘗以此獻先帝深以為然俄命普入相尋普病北狄擾  
邊未及施行今北狄已息繼遷請命正是行此十事就  
太平之日至於省不急之務削煩苛之政不用小人不

與奔競之流以官爵開直言之路此皆致太平之術陛下十行其八九矣又繼遷小有不恭不足深責平城之事至弱也漢祖行之以安天下近代石晉用景延廣之言以絕和致天下橫流豈得為強聞彼所貪嗜者禽色利欲漢祖明皇所用之計正可以弭敵心又自古輔佐聖明建萬世之基立不拔之策者未有不由宿舊大臣未聞市井之徒塵走之吏能為之也願陛下察此則纖人不敢萌心大賢得以畢力矣疏奏上頗嘉歎後知福

州代還民刻石於所經之橋名曰去思泌名知人少許  
可平生薦士曾不過數人後皆至卿相每欲發薦牘必  
設几案置章其上望闕再拜曰老臣又為陛下得一人  
王文正公旦即其所薦也知襄州日鄧城令張逸有善  
政縣去州十餘里泌暇日乘小車從數吏渡漢水至鄧  
城界以觀風謠或載酒邀逸野飲吟嘯終日而去薦逸  
官至樞密直學士為時名臣西祀還授泌右諫議大夫  
判吏部銓盥沐巾褐端坐而終身不歌側時年六十三

歸葬鄉里錄其子衍為太常寺奉禮郎衍為將作監主簿

張密學

張密學秉字孟節太平興國中試進士儀狀豐麗屬詞敏速美書翰太宗嘉之擢置第二出入中外累歷要職為度支員外郎知制誥同判吏部流內銓唐故事首曹罕兼制多退為行內諸曹遷首曹自此始後知河陽澶滑二州真宗北巡迎謁境上俾預從官侍食駕還召歸

東封詔與知制誥王曾訪問所過耆老送閣門引見并具州縣繫囚所犯聞奏祀汾陰為留守判官時向敏中以尚書為留守秉出入與之聯騎少所撓抑時議以為非後以樞密直學士再知并州將行上作五言賜之卒年五十六錄其二子通遯竝為大理評事秉好潔輿服飾飲膳以詫賓客家貧質衣以給其費人頗譏之

小魏太尉

小魏太尉瓘字用之以蔭補校書郎為開封府倉曹參

軍會上元與內侍督作燈山而內侍誅索擾人璿密以  
狀聞詔為杖內侍於省中監襄邑稅門人魏綱上章詆  
天書流海島璿亦坐停官後知衡山縣衡山祠旁舊禁  
採伐而寺僧倚中貴人輒犯禁無敢問璿捕送於州州  
將依違不為決璿疏不已卒抵以罪歷提點廣西刑獄  
轉運使溪洞婦人緣逋責沒邕州為庸使者二千餘人  
悉還之劉鋹時舟船皆計口有稅而雷化廉高竇五州  
獨未除璿為除其稅罷柳州無名之役四百人後以太



常少卿知廣州廣素無城為築城環之又疏江東門鑿東西澳為水閘及儂智高入寇圍廣州五十日不能下朝廷以為功時瓘方知越州特遷工部侍郎集賢院學士使復知廣州給禁卒五十得便宜從事代還糾察在京刑獄時議開六塔河而塞商湖北流瓘往視之以為不可其後決河卒不可塞而德博之民大罹昏墊五溪蠻叛除龍圖閣直學士知荆南朝廷方議征討瓘以為五溪之險師行鳥道而諸將貪功生事非國家之利條

三策招安為上守禦次之攻守為失不報後卒招安之  
以吏部侍郎致仕卒贈太尉年七十一子續纁絳紘紳  
純綢綸紀紹綽綸以才擢守吉州紹字承之以父任為  
將作監主簿嘗知虞城縣禁捕博而盜止留守下其法  
管當合流鎮歲大饑度請報不及事乃先發廩後以聞  
旁近賴之通判絳州行州事新廟學具師徒士故沈浮  
俗間檄縣諭出之講試以時紹與其屬過焉後以右朝  
散郎知嘉州自唐開元獻荔子而近世樂用朱桑所產

久益微不給求而刑者衆嘉祐中有賢守哀之作二詩  
刻石以諷紹將行貴要多求者摹其石詩以報黥賈奪  
人鹽井更數守訟不決紹刑而還之為人孝友和審不  
受私居無子弟過出有吏能常有勞再登格而賞不及  
亦不自言紹聖初卒子汶

查賢良

查賢良道字湛然與陶同祖父元方以蔭歷殿中侍御  
史太祖平江表元方隨李煜納款為滑州掌書記道器

量弘偉趣尚平淡至性慈孝動遵禮法在滑州母病綿  
惓調進藥劑經旬不解帶母思鰈魚方冬市無有道泣  
禱於河鑿冰解衣取之得鰈尺餘以饋母疾尋愈居喪  
絕酒肉盛寒布衣徒跣杖而後能起太宗遣使採訪川  
峽知州通判能否多不稱者唯李虛已薛顏邵曄及道  
等七人被詔獎諭咸平四年擢賢良方正能直言極諫  
對策第一移左正言直史館京東漕運使真宗喜談經  
嘗命馮元講易謂曰朕不欲煩近臣久立欲於齊亭閣

選純孝之士數人止如同人便裘頂帽橫經竝坐暇則  
薦茗果盡笑論削去進說之儀遇疲則罷元薦道及李  
虛已李行簡三人虛已母喪明醫者曰浮翳泊睛能舌  
舐千日者可勿藥自愈虛已舐之二年遂復明行簡父  
患癰痛楚行簡吮之敗膏不唾於地父疾亦愈上立召  
之日令陪侍喜曰朕得朋矣將祀汾陰命道權判留司  
尚書都三館道求扈從以杜鎬代之天禧二年以龍圖  
閣待制知虢州卒年六十二道為人輕財重義初就試

貧不能上道親舊斂錢三萬遺之道出滑州過父友呂  
翁家翁喪無以葬母兄將鬻女以辦喪事道傾橐悉與  
之且為嫁其女是歲罷試時人以比郭代公又有同僚  
死女為人婢道贖之以嫁士族在官雖俸入豐厚分給  
宗族孤寡為畢嫁娶者十餘家以是常匱乏所至務寬  
恕胥吏有過未嘗笞罰民有訟捕負者或出已錢償之  
嘗出案部路旁有佳棗從者摘以獻道即計直挂錢於  
木有文集牋表行於世

安定先生孝行錄稱詣黃河禱  
祀垂釣獲魚而范蜀公蒙求及

玉壺清話皆言鑒冰得之今從蜀公說又安定稱字真之蜀公兩處皆言字湛然云

### 俞待制

俞待制獻可字昌言歙縣人其先居河間晉永嘉之亂徙新安端拱初登第歷歸州軍事推官權領州事會李順反川峽官吏多有棄城城中老幼亦亡去獻可料州兵屯沿江柵以遏奔者不能禁得亡命二人斬以徇衆乃定後以御史中丞王嗣宗薦為監察御史建言天下所上瑞物不在圖牒者毋得以聞歷提點廣西刑獄初

撫水蠻數內寇獻可以為前守吏姑息之過請發兵窮討之丁母憂特起為轉運使卒平定之為立互市築塞以扼其險自是蠻人不復犯邊推功官屬未嘗自言仁宗時擢龍圖閣待制權吏部流內銓子希甫希孟皆登第希甫終和州推官希孟皇祐中殿中侍御史希孟孫正圖復登政和五年第云

俞侍郎

俞侍郎獻卿字諫臣獻可之弟始學師友其兄彊力敏



給以儒術自任後遂相繼成進士名聞當世調芎陂尉

仁廟諸臣傳云安豐尉而劉元父為作誌云芎陂

臨事明察善鉤人情推顯至

於隱以故盜不敢發發又輒得有僧積財甚厚其徒有  
告其出遊者獻卿揣其有姦曰吾與而師善不告而去  
何也告者色動因執之得其所瘞尸一縣大驚調昭州  
軍事推官陳進亂嶺南轉運使以象州守懦不任事檄  
獻卿往護之及至守已謀棄城遂止之教堅壁治兵守  
得免誅賊亦不至部昭民往輸之粟及事平議留昭民

伐山林以治官府獻卿曰役病矣不可示信請期三日  
許之民知不久役皆勸功趣事事如其素初昭州積錢  
巨萬獻卿盡用以糴穀至是賴以供軍陳進平上功第  
一仁宗即位轉侍御史為三司鹽鐵判官上言天下穀  
帛日益耗物價日益高民力安得不屈今稻苗未生而  
和糴桑葉未吐而和買轉運使務刻剝以增其數歲益  
一歲又非時調率營造一出於民是以物價積高而民  
積困也嘗以景德中西戎內附北使通好最盛之時一

歲之用較之天禧五年官吏要冗財用贏縮色役多寡  
釋道增減其利害較然可知况自天禧已來日侈一日  
又甚於前夫卮不盈者漏在下木不茂者蠹在內陛下  
宜知其有損於彼又鑒其無益於此與公卿大臣朝夕  
圖議而極之則天下幸甚上納其言為罷諸宮觀清衛  
兵省浮屠老子祠醮及佗無名之費以巨萬計淮浙鹽  
歲耗十三萬尚書經費不足命往視之至則條廢舊弊  
以新法從事吏盡償所負又增五百萬石會兄為鹽鐵

副使乃徙開封府判官時陝西兵食不足方擇轉運使宰相數進擬無合意者因言獻卿天子識其名曰是前使淮南者可其奏至部三日得半年之儲終歲餘二年食雖一切方畧然民不以為病涇原塞外武延川本羌地諸將欲為己名請築堡鑿壕獻卿奏以為不可許未幾寇果至殺掠將士塞所鑿壕而去徙京西因入對言將帥范仲淹明鎬可大用及條上邊策甚備後以集賢院學士知杭州嘗因暴風江湖溢決隄勢不可禦獻卿

大發卒鑿西山石作隄數十里民便之賜書褒諭元昊  
叛西邊大擾獻卿時知宣州詔問所欲施行條上十餘  
事朝廷稱其知時務晚以工部侍郎告老轉刑部致仕  
獻卿為人高明剛嚴論議立規矩似不能容物至持獄  
平易不妄有所輕重其在京西錢丞相為許州厚賓客  
之奉歲費千萬執政素不悅且疑其有私會獻卿奏事  
至京師因開端問之獻卿對無他世以為長者卒年七  
十六子希楚司門員外郎希元進士及第早卒希及虞

部員外郎希旦登第終朝議大夫而希楚子叔良獻卿族孫師錫師錫弟之子舜凱皆登第師錫官朝奉大夫凡俞氏登第者十人顯者甚多

洪比部

洪比部湛字惟清休寧人世仕江表湛幼好學十歲能屬文未冠錄所著十卷號韶年集以進士有聲於時雍熙二年廷試見黜真宗既賜進士梁顥以下百七十九人第翌日詔殿前不合格及南省不奏名進士內文采

可取者令再試帝復御崇政殿內出廷燎賦淡交如水  
詩得湛以下七十六人竝賜及第以姓名附本等湛以  
文采適麗特升第三人後以右拾遺直史館賜緋坐與  
宋沆等上書忤旨落職知容州累遷比部員外郎移知  
郴舒二州咸平二年召試皇帝孝德頌詔復歸館判三  
司都磨勘司知制誥同知貢又修起居注坐知貢日受  
賄除名流儋州移惠州道卒年四十一詔以子幼給錢  
一萬官為護喪歸後以為例

仁宗諸臣傳云任懿以銀二百五十兩賂王欽若登

第後被告上方顧欽若厚懿更云湛湛使陝西還而獄已具官收湛賊家無所有乃以所假梁顥白金器輸官人多湛美風貌俊辯有才幹方議修綏州宰執向敏中冤之湛贊成之而呂蒙正王旦以為不便使湛馳驛相視條奏七利二害卒修之凡五使西北採訪邊事上甚眷待有意擢任之預曲宴賦詩深被賞激有集十五卷

聶內翰

聶內翰冠卿字長孺歙縣人

冠卿傳云師道葬歙州遂為州人按問政先生傳師

道家世在歙但沒於七世祖師道楊行密版奏號問政揚州自揚州歸葬耳



先生鴻臚卿父致堯登咸平三年第贈禮部尚書冠卿  
登第為連州軍事推官秩滿以文謁翰林學士楊億大  
器賞之於是大臣交薦召試學士院入館閣校勘仁宗  
時累歷中外遷工部郎中景祐中李照改定大樂引冠  
卿為檢討雅樂制度故實官別詔與馮元宋祁修撰樂  
書為景祐廣樂記又以警嚴一奏曲不應再用乃製奉  
禋歌以備三疊詔冠卿及照造辭以配聲下本局歌之  
是年郊祀遂用焉冠卿特遷刑部郎中直集賢院後為

賀契丹生辰使其主謂冠卿曰君家先世奉道子孫固  
有昌者嘗觀所著蘄春集歌詩極清麗因自擊毬縱酒  
命冠卿賦詩康定二年入翰林為學士丁母憂起復兼  
判昭文館未幾兼侍讀學士冠卿每進讀左氏春秋必  
引尊王黜霸之義以諷一日墜笏既退上顧問內侍曰  
冠卿清羸如何也對以居喪毀戚所致乃出禁中湯  
劑賜之因告歸營葬至揚州卒詔以其弟太常博士世  
卿通判宣州後又以宋卿為校書郎冠卿嗜學手未嘗

釋卷有蘄春集十卷河東集三十卷子友仲平仲儀仲  
文仲公仲慶厯二年友仲以正字升親民任使平仲文  
仲竝以太廟室長升正字儀仲熙寧中虞部員外郎通  
判衛州四年十二月判大名府韓琦言王拱城危急儀  
仲抱疾馳赴總徒修築因此病亡特賜絹百疋文仲子  
循矩登元豐中第世卿天聖中進士皇祐中為職方員  
外郎知萊州會通判井淵為盜所擄御史以為言世卿  
坐降知信陽軍後終太常少卿子武仲南仲微仲恭仲

武仲登皇祐中第

許待制

許待制元字子春世以孝謹稱鄉里父亡一子當官兄弟相遜久之曰吾弟才後必庇吾宗乃以元補郊社齋

郎

魏泰東軒筆錄云王章惠公隨知揚州許元以士子上謁自陳唐許遠之後章惠率同僚上表薦其忠烈

之家乞朝廷推恩通判以下皆不從章惠遂獨狀薦之朝廷以為郊社齋郎而歐陽公為元銘誌稱得父官故從徙廣陵力耕以養母歷泰州軍事推官戍軍千人自

海上亡歸州守聞變不知所為詰其所以來三人前對

元叱左右執之曰惑衆者此爾其餘何罪勞其徒而遣之遷鎮東軍節度推官知丹陽縣縣東練湖決水一寸為漕渠一尺故法盜決湖者罪比殺人會歲大旱元請借湖水溉民田不待報決之守遣吏按問元曰便民罪令可也竟不能詰所溉萬餘頃歲乃大豐再遷太子中舍監揚州博鹽和糴倉知如臯縣所至民愛思之為吏喜修廢壞其術長於治財自元昊叛河西兵出久無功天下勞弊三司使薦元材命主權貨元言先時賈人入

粟塞下京師錢不足以償故錢償愈不足則粟入愈少而價愈高是謂內外俱困請高塞下之粟下南鹽以償之使東南去滯積而西北之粟盈此輕重之術也行之果便是時京師粟少而江淮歲漕不給大臣以為憂叅知政事范仲淹謂元獨可辦乃以為江淮兩浙荆湖發運判官至則治千艘浮江而上所過州縣畱三月食其餘悉發而州縣之廩遠近以次相補不數月京師足食乃考故事明約信令發斂轉徙至於風波遠近遲速賞

罰皆有法凡江湖數千里外談笑治之不擾而用以足  
先是官造船多虛破釘鞠已入水不可稱盤乃取新船  
焚之火過得其釘鞠之數校所破纔十之一自是立為  
定額其處事精密如此初以殿中丞為判官已而為副  
為使每歲終會計來朝上必加恩禮再遷尚書金部員  
外郎數求解職上謂輔臣曰發運使總六路州軍八十  
有一其財貨調用幣帛菽粟歲千百萬宜得人久任今  
元累章求解朕思之不若獎勵以盡其材賜進士出身

除侍御史遷工部郎中天章閣待制凡在職十三年乞  
郡至八九乃以知揚州歲餘徙越州泰州嘉祐二年卒  
年六十九先巡江淮歲漕京師者常六百萬石其後十  
餘歲歲益不充至元為之歲必六百萬而常餘百萬以  
備非常逮去職有勸元進為羨餘者元曰吾豈聚斂者  
哉為人善談論與人交久而益篤居家孝友所得俸祿  
分給宗族無親疎之異子宗旦揚子縣主簿宗孟守將  
作監主簿



## 許長官

許長官俞字堯言父遂善事母里母勵其子輒曰汝獨不慙許伯通乎祥符中封泰山加恩羣臣仲父逖當遷以讓遂乃以遂為將作監主簿俞風貌魁傑襟局峻整尚節槩不妄交游下筆立言慨然有濟世意逖器之曰吾家千里駒也少喪母事父以孝謹聞所欲雖千里必致後以貢如京師安輿扶持僦居都下俞與妻子同糲糲晨夕進饌必珍厚公卿聞者率俸佐之父年垂八十

謂俞曰覩汝登科吾沒無憾矣祥符七年果登第授汾陽從事歸有日父疾篤俞晝夜供侍澣濯必親或問之俞言澣濯於家人之手慮其厭也居喪毀幾滅性家貧假貸終大事或厯父所經由涕泣永日嘗寄泊揚州通津佛舍方春閉室靜坐未嘗出偶過琅山別院馬上忽泣下僕問其故曰我父嘗寄處此也士流服其孝服滿詔超資授揚州從事嘗知大冶縣縣人至今稱之二子均相為進士

呂狀元

呂狀元湊字濟叔曾祖裕贈兵部尚書祖文膺官至太子左贊善大夫父士元字佐堯咸平二年擢明經為醴陵尉歷彭原四會太和隴城縣令為人剛介有節長於為政醴陵太和皆大邑民喜鬪訟往往因事申吏以法吏多不免士元日與長吏爭曲直下為邑民伺候終無毫髮過失可得民卒愛思之四會近海俗雜蠻夷士元尤知其人利害事所經決後有欲輒改更者民必自言

於庭曰此呂君所決豈可動耶後人亦莫能改也入仕三十餘年以一縣令之祿衣食其族四十餘口雖薄而必均生淵濬淙淇淵登進士第嘗為秘書丞濬景祐五年試進士為第一授將作監丞康定中獻其所業召試學士院賦及詩三入上等除著作郎中直集賢院至和中以翰林侍讀學士知徐州當辭特命於資善堂賜宴以餞之仍詔自今由經筵出者以為例時蔡襄韓絳皆相繼出守而歐陽修賈黯亦求郡知制誥劉敞疏論邪

正進退之分正臣常難進而易退邪臣反是呂溱蔡襄  
歐陽修賈黯韓絳皆有直質無流心議論不阿有益當  
世誠不宜許其外補使四方有以窺朝廷啓姦幸之心  
而殿中侍御史趙抃亦上言近日正人賢士紛紛引去  
憂國之士為之寒心上悟頗留修等溱嘉祐三年知和  
州坐言者奪職分司南京熙寧初擢為樞密直學士給  
事中卒神宗手詔曰呂溱立朝最孤知事君之節絕跡  
權貴故中廢十數年無人冒為達之者朕近擢領要務

頗著風績今忽淪亡甚可嗟悼又溱家貧一子幼駭可  
令常賻外量與優給及一行葬事官為辦集庶示將來  
以勵臣節贈禮部侍郎溱為人喜自貴重知杭州日接  
賓客不過數語時人目為七字舍人開敏善議論一時  
名人多推許之

孫工部

孫工部抗字和叔黔縣人其先棄廣陵以避孫儒之亂  
抗少孤力學寄食浮屠山中步行借書數百里升樓誦


之而去其階數年具衆經遂博極羣書為文操筆數百  
千言始同學究出身歷官後登進士甲科知潯州當是  
時人未趨學抗改作廟學召吏民子弟秀者親據案講  
說勸誘以文藝未幾旁州士皆來學學者由此遂多以  
選通判耀州兵士有訟財而不直者安撫使以為直抗  
爭之不得乃奏決於大理大理以抗所爭為是用其議  
編於勅慶厯二年擢監察御史裏行奏彈狄青不當沮  
敗劉滬永洛城事又因日食言陰盛以後宮為戒仁宗

大獵於城南衛士不及整而歸以夜明日將復出有雉  
隕於殿中抗奏疏即是夜有詔止獵蠻唐和寇湖南以  
抗按撫奏事不合因自劾乃知復州後稍遷都官員外  
郎提點江南西路刑獄有言常平歲凶當稍貴其粟以  
利糴本者抗言此非常平本意也詔又從之儂智高反  
抗即出兵二千於嶺以助英韶會除廣西轉運使馳至  
所部而智高方煽上遣大臣部諸將兵數萬擊之方時  
搶擾抗驅散亡吏民轉芻米又以餘力督守吏治城修



械屬州多全而師飽以有勞遷司封初抗請斬大將  
之比者發騎軍討賊及後賊所以破滅皆如其策卒年  
五十六官至工部郎中抗為州務整齊大體闊畧細故  
與賓客談說絃歌飲酒往往終日而罷聽用僚屬盡其  
力事以不廢在御史言事計曲直利害如何不顧望大  
臣以此無助自少為文以類集之為百卷子適邈迪适  
邁適從王荊公遊年十四議論著書已驚人登第後終  
永州軍事推官邈嘗為縣令荊公亦稱其好學能文自

迪以下及孫畧皆登進士第



新安志卷六